

曝書亭全集

冊二

曝書亭集卷第一

秀水 朱彝尊 錫鬯

賦

謁孔林賦

粵以屠維作噩之年我來自東至於仙源斯時也壇杏花繁庭檜甲
坼元和之犧象畢陳闕里之榛蕪盡闢既釋菜於廟堂旋探書於屋
壁乃有百石卒史導我周行牽車魯城之北縹馬洙水之陽卽大庭
之遺庫循端木之故場驕孫祔兮居前聖子藏兮在左自黃玉之封
緘閱幽宮而密鎖隕長鯨兮不驚懾祖龍兮遠禍除荆棘之叢生罕
翔禽之飛墮雨露旣濡遲景東隅整衣裳之肅肅正顏色之愉愉展
謁方終誕尋往蹟超白兔之深溝撫青羊之臥石爰有草也苞著其
名守之以龜一本百莖我求其德洵圓且靈爰有木也題之以楷非
柏非縱靡癭靡虜歷千禩而長新貫四時而不改惟先師之遺澤道

莫著乎六經配光華于日月若迭奏之琴箏降而後儒各事采獲中
文古文之書先天後天之易目鄭衛以淫邪誣春秋以深刻貌往哲
之嘉謨恆未師之是則滔滔天下後死其悲安得起素王於泉壤操
筆削而正之我思古人恥同汚俗或六聘而收身或三詔而逃祿或
依李充之山或就張超之谷潛戶壁于服虔變姓名于梅福入源水
兮栽桃隱丹霞兮種竹詎如此地桑海不遷可游可息有歌有絃耳
不聞僧尼之魚板目不覩旗鼓之樓船樂土樂土速營一廛願爲林
戶躬耕墓田庶幾近聖人之居讀聖人之書將不得爲聖人之徒也
與

春蒐賦

皇帝御宇十有八年握金鏡運玉璇超百王之聖域漱六藝之神淵
德無遠而勿屆聲有濯而彌宣舞兩階之干羽靖萬里之戈鋌雨洗
炎洲之瘴波澄閩海之煙聿將秩祀衡岳底定巴滇猶克嚴夫武事

洵無逸而有虔乃
命僕臣乃

召司馬選烝徒以大蒐諏吉日於小雅晉鼓則百二咸陳虞旌則東西來下車鏤象以煇爛駟飛黃而白赭風清紫陌之塵天闊黃圖之野於是乎駕六駿從百官建九旂總三單經長楊陟上蘭遵路直從橋安歷平原之廡廡瞻秀木之丸丸雲霏霏兮五色山磊磊兮層巒斯時也穀雨新晴暮春之序劍乍捧乎金人觴甫浮於鶴羽亞繁杏兮山郵舒崇桃於野圃藥苗則的的依闌萑葉則青青被渚粉颺鳳子之衣綠潤桐孫之乳雉角角兮晨飛烏啞啞兮晚翥兔趨趨兮淺草之叢鹿呦呦兮平林之塢爾乃刷霧鬣騰風髮擊鷲鳥搏毅蟲落驚雌駭高雄輕裘兮不御暄景兮方融釋其一面之網射以九和之弓三驅兮四牡一發兮五縱於焉斂綏章徹表貂張幔城羅藻帟息蔭乎高林容與乎秀澤數獸計鮮犒勤讚獲大庖不盈

乾心有懌用訓儉而昭仁豈丘崇而山積調六膳而作甘飲三漿其
如液則有飛龍之舸鳴鶴之舟梁排雁齒水漲鴨頭和迴波之妙曲
詠在藻於中流沙停振鷺擢起眠鷗白魚湧躍黃鵠翔留勝昆明之
習戰與華林之沂遊於是川后效珍河宗輸寶山出醴泉地生朱草
鐫十鼓於岐陽列三山於蓬島

天子師湯文之裕民法軒轅之訪道省四野之耕農問百年之耆老
照華薄以春曦浹恩膏於靈沼爭擊壤兮康衢永銷兵兮海表在昔
成王繼序四征弗庭旣巡侯甸萬國咸寧暨漢文帝邊宇肅清猶選
良家於六郡躬戎服而治兵稽春蒐之盛禮允治世之大經豈其實
客是燕乾豆是營惟居安而必慮斯坐致夫太平敢擬廣成之頌用
垂休美之聲

太極圖賦

原夫黃牙欲發蒼精未垠一氣融結萬象胚渾馮馮翼翼烟烟煜煜

睢睢盱盱繇繇分分旣龐鴻之莫兆何聲臭之可聞量則包夫清濁
質斯合乎昭昏謂虛無而有象運妙有而無鄰鴻靈幽紛泰貞蠢闢
混成天地之先互藏陰陽之宅觀動靜兮無端占迴游兮不隔譬水
車之恆轉類果核之未坼爾其理則貫一象實函三白麟之書莫吐
赤雀之籙未銜名雖傳乎十翼義尙晦乎周時啓華山之妙蘊藉營
道之幽探種穆祕師授之說朱陸滋異同之談至希至微無偏無側
一翕一施半白半黑外若離玦中如含薏萬物於焉化生五行之所
糾纏成能設位圖往鏡來化一氣甄三才天根啓月窟開悟儒言於
冥蹟允經學之倫魁乃知聖人能備全體先知可詔後覺大道爲事
物之母

天子有簡能之學用廣運而不窮信範圍之非邈願永繪於丹扈方
金鑑之在握

夜明木賦同澤州陳侍郎作

皇帝避暑於興州時維昭陽大淵獻之秋尋捺鉢之舊蹟啓帳殿於
仙陬六屯內肅千廬外周雲容容兮四合水泱泱兮交流風颯颯兮
徐來雨霏霏兮乍收爰有物焉星芒遙逗明滅露螢之尾吐吞火雞
之珠謂野燒而不延疑神燈而未輟迺

命俞騎卽而視之是爲虜木有枿無枝黝同桴炭澀若榴皮如場之
轉碌礪如絳之拽豐碑載以堅車駕之健犢入重關度平谷選郢匠
以運斤俾奄人以司局舍科上槁存堅多心近

天顏兮咫尺位祕宇之崇深鑽不勞兮司燿燎無灼兮烘熨等璧夜
光類珠宵映方角枕而輝盈比風簾而神定四照儷若木之華 六
宮擬賓連之慶豈非

聖德之咸臨固無遠而弗鏡宜坤珍之畢效雖枯木朽株亦疇德而

瑞

聖

省方賦

歲在甲子曆應上元

聖化翔洽東汜西崑九州之外郡縣重譯而至橋門嘉穀駢穗濁河
激源於時山祇望

幸臣庶上言請欽柴以郊岱或奉符而封巒

天子思省方以設教用求莫而監觀踐六十四民之遙迹省七十二
后之彌文吉日既諏

德音斯布蠲六軍所過之租減四方惟正之賦推

湛恩於槐宸霈解澤於棘路神人文贊遐邇樂附願儲祉以慶成共
希光而景鶩迺以九月辛卯農事備收七騶始駕百工方休扈千官
於

行所勒五營於道陬既伯既禱爰豫爰遊承曲璠之璇蓋建太常之
辰旒導以金鉦瓊斂驂以紫燕玉蚪鳴葭而雲韶並和駐罕而星廬

外周黃圖三輔青壤千里濟鬲津以無波履平原其如砥則有單椒
秀澤之山側坎飛輪之水橋號鵲華湖名蓮子踰歷下之舊城尋介
丘之遺趾美哉左海山有岱宗閭啓仙人之石官存大夫之松天雞
鳴而躍曰

宸駕至而呼嵩徹稽席蒲車之制罷泥金檢玉之封於焉訪淮土之
仙茅驗吳門之白馬渡河則神獻其實遵海而風不鳴瓦泛藻舟於
中流息參旗於大野越南克與南徐溯吳下而白下

帝有恩言宣示函夏眺勝國之蒿萊封蔣陵之松檟
德無施而不徧

恩未沾者蓋寡由是展軫素王之里致齋金絲之堂陳元和之犧象
循闕里之宮牆懸車在廟遺硯在牀肅拜杏壇之上翔步檜庭之旁
洵禮隆乎三古而事冠乎百王衡律既同秩祀有典振旅則邇考祥
斯遠覽四瀆而經五州乍六旬而還輦

兩宮交悅萬姓齊忭粵若稽古時致太平必命掌故登封告成或紀
社首繹繹或禮云云亭亭石城石距之狀金匱玉匱之形祺安禪安
之樂封壇覲壇之銘莫不雲連帳殿雷動山庭未有諮詢疾苦彰瘝
濁清不警不蹕不震不驚凡高年之耆老尺口之童嬰婦子所集商
旅所經咸得覲

天顏於咫尺瞻仙仗於郊垌至若

天縱之能溢於筆墨月璧星珠寶題靈式鸞蹤鳳藻被物成飾輓唐
帝之八分陋宋宗之飛白扁榜峨峨發舒心畫蔭之華棖勒之貞石
誠與日月雲漢共昭垂於無極者也

湘湖賦

歲柔兆困敦兮是月維陽辭鑑水之一曲兮言歸故鄉遵大路于蕭
山兮猶勾踐之舊疆舍予舟于城闕兮別問渡于陂塘踐荒塗之幽
辟兮山是越而湖湘圍列岫之周遭兮匯一水于中央尊絲苻帶齊

消歇兮澄百頃之波光相茲湖之寥闊兮溯蒼蒼之葭葦漾輕舸而
如所如兮逾五里而十里鮮澤農之耕作兮但眾師之棲止雉角角
以飛鳴兮鷺娟娟而停峙瞻牛頭與苧蘿兮信不遠而伊邇愛山川
之清淑兮斯生長夫西子洵明豔之絕倫兮直夫差之一死以餘暨
爲諸暨兮驗往牒之非是眺越王之故崢兮丁國步之迍邐會稽不
可保兮稱臣妄而播遷洊臨江而祖道兮奏哀曲于烏鳶迨返國而
渡三津兮惟八臣四友謀猷之後先既十年而生聚兮更教訓之十
年簡俊士之四萬兮率君子之六千誕一舉而沼吳兮齊衣錦而師
旋離九世而當復兮豈身取辱而忘焉志既立而轉死爲霸兮胡後
之人獨不然他山難久留兮問西陵而前路夕既濟于錢唐兮尙踟
躕而迴顧徒弔古而慨慷兮惜年歲之遲暮

水木明瑟園賦

并序

僕生平不耐作賦雖以賦通籍非稱意之作不存也康熙甲申八月

陸上舍貽書相要過上沙別業遂汎舟木瀆取道靈巖以往抵其閭
則吳趨數子在焉愛其水木明瑟取以名園上舍延賓治具飲饌豐
潔主客醉飽留七日乃還念勝引之難再也成賦一篇先民有言人
各有能有不能賦非僕之所能也辭曰

度十畝之地葺宅一區止有阡而可越潭分沙而不淤翦六枳而捷藩
因雙樹而闢閭嘉水木之明瑟愛徑畛之盤紆山有穴而成岫土戴
石而名岨礪兩判而得路萼四照兮盈株園之主人則陸生積也匪
聲利是趨惟古訓是茹鼓枻而吟帶經以鉏不隱不仕無礙無拘良
辰旣撰爰遣莊奴筆疏告吾商臆乍肅赫暑早祛葵傾芳步柰秀華
芙桂英粟綻阜莢條麤茗縛厥帚鎌刈其蕪井汲鉞綆牀轉轆轤靡
塵不滌靡穢不除可以譚讌可以歌歛夫子惠顧跂屨無虞於是竹
垞一叟誕發僧廬遵彼橫塘津遠岑隅風塘傘竹日漏衣衲亦有同
調數子素心相於水抽其帆陸柅其車不速而集語笑軒渠離坐貫

坐或跣或趺生也敕中廚剖兩諭誠食饌之次第傳方法于臆胸乃羹乃滷間以脯脰軟則有蒲鮓則有菹擘翠房之鮮酌剝紫芡之員珠旋棊改令覆斗傾盃倒季路之十榼慕宣尼之百觚生起避席顏色敷愉稱園雖小聊可以娛夫子賦之可歟否歟叟曰可哉吾思魯鈍毋疾而徐於焉閉關納屨自晨及晡拂几案屏翫餽挹勺水注蟾蜍默聳羸肩潛捋短鬚雖有千慮終成一愚譬諸奏事四足而非馬書券三紙而無驢爾乃舍左思之席溷投鍾繇之筆拊循蘭陔踐椒塗躡聽雨之樓梯登升月之窗迳流覽帷林蕩漾方壺心傾意寫志豁神攄留宿宿兮信信忽便便兮諸諸而曰猗茲園之怡曠兮經夫差之故都駐我馬于高岡兮想越來之師沼吳傷西子之不作兮徒憑弔于交衢聆寶屨而聲銷兮剩紅心之草鋪嗟宮牆流水之入兮驗妖夢之非誣既上山而下山兮復自田而之湖回瞻巖椒之夕陽兮挂霄漢之浮圖逼茶隴之葱青兮占稻田之豐腴耘雖資乎疆以

兮穫免發彼租符眺松臯之明秀兮步衡薄而踟躕辭八門與七堰
兮遠肥膩之姑蘇望之叢叢蒼鬱卽之羅羅清疎旣外隈而內隩亦
前消而後沮澄希偪側丘不崎嶇澗無飲虎穴少潛狙石梁緩度坦
坦舒舒春則桃殷李縞夏則筍白櫻朱蓄一丈兮爛漫香五木兮紛
敷架層闌之曲彙刺不慮夫牽拏又有同心宿蕙並蒂新萼未八月
而剝棗先九日已囊萸野芳斷兮復續湛露晞兮更濡訝鷓鴣之撲
鹿縱烏烏之畢逋啾啾楚雀汎汎江鳧雀則有鷖鳧則有雛翠羽定
巢而不去文鱗在藻而忽徂非無牛宮豚柵麋冢兔置羝藩鹿些雉
艾雞斂螃蟹設斲鱸鮪施罟寧寬便了之僮約而免責其辛劬彼玉
山之仲瑛暨光福之良夫連峯列岫夾澗通瀟豈若斯之一丘一壑
不見其隘而祇見其有餘且客獨不聞茲園經理之初邪曩有高士
蜚遁山屨履穿東郭面垢左徒垂蘆簾于紙閣然鶉葉于瓦壚朋慵
迎兮勿送戶罷闔而不逾柏雖生兮上槁桐已齟而无膚斯人去兮

猿鶴散幸茅亭之尚在對魚幢之咫尺而轉覺其空虛生乃取介白

之遺字

吾鄉徐高士白舊居于此上舍請崑山徐吉士昂發大書介白之亭扁縣之

縣擘窠之大書志先

民之軌躅作後學之範模豈非仁心仁術視富貴利達買宅者攸殊

今吾與諸子飲食宴樂于此倡予和女安知後之游者覩題壁之作

不曠世而相感誦清風之穆如重為告曰四坐莫誼吾言不渝諸君

卜築近在郊郭吾獨寥寥栖小長蘆目極百里何山可居相生之宅

其樂只且兄分布被母御板輿婦采蘋而采蘩子耕菑而耕畚烹泉

則京挺都籃並載入市則修琴賣藥非迂郊關一舍而近津渡扁舟

可呼行不苦于趨趨策不藉乎翼扶我舟弗勞我僕免痛訪翠墨而

椎拓搨黃卷而流輸凡靈威所守唐述之儲莫不籤題置笥裝界開

圖爾雅釋寓齋之屬離騷箋草木之疏僕雖耄矣耽與道俱奇文疑

義猶冀相須友直友諒為德不孤思載家具旁生層櫺卜鄰晨夕我

與爾夫

檇李賦 并序

嘉興古之檇李也檇遵爲切許慎說文解字從木有所擣賈思勰嫁李法臘月中以杖微打岐間正月復打之足子殆擣之義與府治西南二十里舊有檇李城今蕪沒李惟縣東

十里淨相寺有之近苦官吏需索寺僧多伐去將來慮無存矣考之圖經俱不載因體物成篇辭曰

植物有李兮應玉衡之星精受命南國兮特以檇名產維揚吳會之交兮載于魯春秋之經旣殊河沂之黃建兮亦不類房陵之縹青夙傳九標之稱允宜五沃之土自空城之蕪沒遷淨相之梵宇獲要術于齊民授靈方于老圃甄著樹以分岐犁不耕而用拊當其溫風始至法苑徐開井上勿遺糟食林間恰有禽來價方高乎朱仲種不讓夫顏回果熟偏蕃枝低易拜漿均玉乳之梨品勝紅雲之柰相珍果之離核縣弱縷而虛中異懷仁之桃杏必待嫁而分叢宜登玉盤宜

沉冰水雪素蕩而並陳配甘瓜而兩美傳諸故老一事矜奇遇入吳
之西子臙脂之匯舟移經纖指之一搯量心賞之在斯何造物之工
巧兮化千億于來茲雖彼美之云亡兮髣髴若或覩之人情重故鄉
兮雖小物而增慕矧俊味之得嘗兮信土產之有素悵圖經未之及
兮迺宣豪而作賦

曝書亭集卷第一

謝李頌

曝書亭集卷第二

秀水 朱彝尊 錫鬯

古今詩

旗蒙作噩

村舍二首

村舍朱生感遇作也生年十七爲贅壻避兵五兒子橋

村舍有牛宮架以曲尺木牴牾盈四三戀此共泥伏牧童驅使行跨
之上原陸日夕齊下來各自舐其犢吾生命不辰早歲去邦族父母
謂他人安敢望拊畜吁嗟犢不如寢訛從所欲

村舍有雞柵樹近蓬門樞曉日披其樊一雌將衆雛村嫗導之前握
粟呼朱朱當前或更却母啄子必俱吾生早離家南北忽相踰父母
謂他人衆中益羈孤吁嗟雞不若骨肉長相須

夏墓蕩二首

夏墓蕩前停釣輪荒溝極浦易迷津夕陽滿地北風起飛遍蘆花不見人

千戈靜處見漁師羨爾花源信所之豈意义魚艇子集殺機不異銳頭兒

過丘生

丘生避地夏湖曲獨伴流泉結書屋茅柴酒薄留故人破甌夜燒風折木

柔兆闈茂

曉入郡城

輕舟乘間入繫纜壞籬根古道橫邊馬孤城閉水門星含兵氣動月傍曉煙昏辛苦鄉關路重來斷客魂

悲歌

我欲悲歌誰當和者四顧無人煢煢曠野

過吳大村居

泛舟經谷口迢遞入林端一徑野煙夕孤村返照寒榴花赤瑪瑙竹
色青琅玕滿酌主人酒休歌行路難

漫感

淮陰昔未遇旅食昌亭年薄俗愛惜費晨炊固宜焉哀哉趙元叔日
歎囊無錢男兒雖落魄寧受衆目憐相逢游俠子白馬黃金鞭揖我
入酒家飲我斗十千臨觴忽不御拔劍心茫然

暝

暝投人外宿桑柘藹陰陰獨樹歸禽少平川隱霧深松篁初月上鐘
磬夕陽沉漸覺微風起寥寥山水音

平陵東

平陵東蒿艾蓬爾爲誰劫義公撥者金伐者鼓縛義公大旗下帳前
力士頭虎毛傳呼欲下五尺刀如何贖君歸賣白馬我歸賣黃犢

強圍大淵獻

捉人行

步出西郭門遙望北郭路里胥來捉人縣官一何怒縣官去邊兵來
中流簫鼓官船開牛羊橐駝蔽原野天風蓬勃飛塵埃大船峨峨駐
江步小船捉人更無數頽垣古巷無處逃生死從他向前路沿江風
急舟行難身牽百丈腰環環腰環過杭州千人舉擢萬人謳老拳
毒手爭毆逐慎勿前頭看後頭

馬草行

陰風蕭蕭邊馬鳴健兒十萬來空城角聲嗚嗚滿街道縣官張燈徵
馬草階前野老七十餘身上鞭扑無完膚里胥揚揚出官署未明已
到田家去橫行叫罵呼盤飧闌牢四顧搜雞豚歸來輸官仍不足揮
金夜就倡樓宿

北邙山行

北邙山前望行路素車白馬紛紛朝暮誰家丘墓樹龍從白楊粉檜松
柏桐黃金爲鳧石爲馬魚燈熒熒照泉下古碑崩剝無歲年後人於
此犁爲田雄狐佚佚兔矍矍人聲夜哭烏聲樂

春晚過放鶴洲

問訊裴公島春來幾度遊古牆修竹上潭水落花浮煙雨無人境山
泉放鶴洲鷗夷今不見往事問漁舟

雨後卽事二首

暑雨涼初過高雲薄未歸泠泠山溜遍淅淅野風微日氣晴虹斷霞
光白鳥飛農人乍相見歡笑款柴扉

一雨平林外羣山倚杖前蛙聲浮岸草鳥影度江天鳴磬上方寺揚
帆何處船坐疑秋氣近蕭瑟感流年

野外

野外疎行跡深林客到遲江湖殊後會風雨惜前期秋草飛黃蝶浮

萍漾綠池南樓夜吹笛寥落故園思

舟經震澤

澤國東南遠樓船舊荷戈明霞開組練惡浪走蛟鼉橫海將軍號臨
江節士歌重來已陳跡歎息此經過

著雍困敦

董逃行

我欲上登崆峒謁見仙人韓終兩驂白鹿雲中輕車超忽西東駕者
何人木公旁有千載玉童耳長覆髮丰茸天門闔者蘇林復開闔闔
招尋青藍紫桂成陰清風細雨吹襟提壺設席盍簪蒼龍白虎交臨
投壺六博無方中筵促坐芝房有美一人清揚輕軀暢舞洋洋宛若
龍游鵠翔清歌妙曲難忘四坐歡樂未央曛曛日出博桑

五游篇

崑崙有鳥自名希有東覆木公西藏金母

一解

飄風東來吹我西征路

從弱水阿母未經二解雲車隆隆土鼓逢逢道逢仙人言葬雷公三解河

鼓渡河天孫設食奔星馳驅不見太白四解方丈之山其高五千羣仙

往來不願升天五解

少年子

臂上黑彫弧腰間金僕姑突騎五花馬射殺千年狐

雀飛多

雀飛多飲啄野田裏奈何卒逢黃鷄子誰其救者彈以丸何用報君
雙玉環玉環如可不惜黃花與爾食

獨不見

青樓百尺狹巷旁中有桂樹臨高堂啼鳥自將八九子鳴鶴散立東
西廂情人碧玉小家女快馬瑯琊大道王陽春二月獨不見夜如何
其守空牀

曹三秀才 山秀 讀書馨菴同吳大 崔 訪之遇雨留信宿

故人多寂寞而子寄僧房不見長相憶因之暫裹糧野雲停曲几涼
雨滴虛廊欲問歸津渡蒹葭一水長

晚

白屋生寒早蒼煙向晚陰松門清磬遠楓岸夕陽深坐聽農人語多
諳靜者心荆扉猶未掩倚杖數歸禽

題項叟聖謨畫柳

吾家舊宅由拳北恰與胥山樵對門巷柳蕭條今已盡春風猶喜畫

圖存胥山樵項叟自號也

屠維赤奮若

春江花月夜

今夜江中月兼花照水濱春潮寒不起定有弄珠人

芳樹

芳樹不知名當君階下生三春二月暮一雨一番晴看舞山薌曲聽

吹玉笛聲相思人不見終日遶花行去留走小長干

擬古

東鄰有女自名碧玉問年幾何三六未足言采柔桑不盈一朶愧無
南珠以慰心曲原田有雉艾而張羅愛而不見傷如之何楚絲雪

靜夜思

靜夜涼風天氣清開軒白露滋前楹憂人佇立愁屏營仰觀北斗懸
高城浮雲飄忽蒼煙平誰家青樓葳蕤鑰月寒沉沉夜飛鵲

阿那瓌二首

黃塵起踔跂乃自渭橋過小袖織錦袍足踏深雍鞞

問客家何方揚鞭兩走馬四角白虎幡招搖來闕下

那呵灘

聞歡當遠行泣下不可止大編開江津懊惱鐵鹿子

烏棲曲

子舞
天河漫漫月流光錦筵紅袖燈輝煌城頭烏棲夜擊鼓吳王更衣西

同作

嘉興 王翹 介人

深宮烏啼天未旦城頭擊鼓明星爛吳王讌罷星已稀繁霜落樹
烏驚飛

劉生

京華多俠客勇略重劉生一劍酬然諾千金問姓名歌鐘喧北里冠
蓋隘東平聞道龍城戰軍前更請纓

當壚曲

吳姬春酒解當壚隨意絲繩瀉玉壺五馬漫誇秦氏女雙鬟愁殺霍
家奴

小長干曲

江水東流急風波正未安郎今何處去留妾小長干

上章攝提格

同沈十二詠燕

節物驚人往事非，愁看燕子又來歸。
春風無限傷心地，莫近烏衣巷口飛。

夏至日爲屠母壽

臨高臺將進酒，君提壺我鼓缶。
君子且勿諠，小人鼓缶歌。一言我昔從東海上親見上元夫人指爪長，長鬢髮翩翩吹瑤笙，擊石鼓宴者誰有金母投壺玉女爲客豪。青蚪白鹿相招邀，鍾山之李綏山桃李如餅桃，如斗得而食之，皆老壽。今日高堂上壽稱觴，一年三百六十日三百五十九日無如此日長。

夏日閒居二首同范四

略作

蘭草羅含宅，蓬蒿仲蔚園。
桐陰初覆井，瓜蔓漸踰垣。
歸鳥檐前樹，斜陽嶺上村。
無家昧生計，漂泊信乾坤。

草閣親魚鳥江天滿芰荷行吟多澤畔晞髮自陽阿傍水看垂釣因
風聽伐柯高陽尋酒伴乘醉亦來過

放言五首

長門賣賦司馬秦市懸書呂韋吾生恨不能早手載其金以歸
步兵真成老卒德祖亦是小兒功名豎子先遂詩賦壯夫不爲
高士南州磨鏡大夫吳市吹簫男兒不妨混迹何用匡居寂寥
爲文思以冢葬對客寧將硯焚當年必無鍾子後世定有揚雲
種南山一頃豆瞻西疇三徑松耕桑若得數畝吾豈不如老農

八月十五夜望月懷陳大

忱

明月生滄海天橫一氣中遙憐今夜客相對與誰同應有良朋過銜
杯學孟公思之不得見清露小庭空

贈諸葛丈

精燕

旅館張燈夜未央相逢跋扈少年場同來大道朱樓上並坐佳人錦

瑟傍白首悲歌非往日青春把酒是他鄉襄陽耆舊今寥落乘醉還須問葛疆

懷鄭 珣 客淞江

連江楓樹外煙水隔層波歲暮飢寒逼荒城雨雪多故人居谷口策馬去山阿幾日離居恨還應獨嘯歌

寄家孝廉 一是

懷歸當歲晏木落徧江潭作客應相憶離羣自不堪陰風連晦朔寒日下西南早晚依同病窮愁意亦甘

重光單闕

春日閒居

幽棲城市隔好鳥亦來翔閉戶野橋畔讀書春草堂有時欹阜帽終日據繩牀且貰鄰家酒狂歌盡一觴

懷朱山人 扉

別時桂樹秋相送衡門夜不見所思來春水生堂下

語溪道中

小縣初成市經春罷荷戈陂塘湖水緩桑柘石門多入饌鵝兒酒愁

人阿子歌

見吳兢樂府解題

蒲帆十八幅一半客經過

東飛伯勞歌

伯勞飛來燕飛去參辰天上重相遇誰家女兒十五餘織成湘綺三
條裾迴身微步乍生塵巧笑明眸善避人鬱金爲堂桂爲柱中庭新
種相思樹陽春已暮花漸稀可憐高下從風飛

樹萱篇

朱明四五月萱草滿中園花花連枝發葉葉從風翻解一移萱南湖濱

樹萱北庭側亮無同心人馨香詎相識解二兔絲自有枝桃葉自有根

黃花特小草何用通慙慙解三冶容無故懽柔條易顛倒本是忘憂花

翻成斷腸草

解四

秦詞 休洗紅

休洗紅洗多紅漸白人心初不同愛好非前日紅顏絕世衆所尤美
女入室惡女仇

采蓮曲

采蓮女兩槳橋頭去錦石清江日落時羅裙玉腕花深處采蓮童素
舸游湖中江謳越吹歌未歇朱脣玉面來相逢共道江南可采蓮湖
中蓮葉已田田攀花風動飄香袂照水萍開整翠鈿翠鈿香袂逢人
少回看蘭澤多芳草青鳥飛來啄紫鱗白蘋斷處生紅蓼雲起暮流
長飛花鏡裏香雙雙金翡翠一一錦鴛鴦鴛鴦翡翠飛無數蘭橈並
著輕搖櫓素藕連根絲更柔紅蓮徹底心偏苦誰家年少垂楊下出
入風姿獨妍雅岸上徘徊七寶鞭湖邊躑躅千金馬淥江腸斷起歌
聲惆悵方塘一望平水上輕衣吹乍濕風中細語聽難明沙棠舟繫
青絲絳相邀盡說江南樂白露初看翠蓋飄秋風漸見紅衣落橫塘

燈火采蓮歸隔浦歌聲聽已希雲間月出開煙樹惟見沙明白鷺飛

寄胡明府

振芳

老去甘垂釣秋深歎轉蓬虛堂驚蟋蟀涼露滿梧桐隱吏思梅福忘
年得孔融飄零方有日清宴幾時同

雞鳴

東方未白雞長鳴離人束帶步前楹中閨切切再三語曉寒入室燈
光清家童驅雞誤相觸膈膈膊膊飛上屋

讀曲歌

素藕生池中紅荷浮水面與汝同一身本自不相見

華山畿三首

華山畿弩張不發箭知子未投機
兩相望儂非弧矢星安能長對狼
奈何許安得鳳凰子迎接儂與汝

游仙三首

東土非吾好西征豈憚勞何能從桂父且自學盧敖入水騎龍竹耕
煙種鴨桃不知閩風去員闕幾重高

八桂何時植雙鸞此日嗚然犀分水族懸鏡照山精片石臨河見浮
槎貫月行心知逢織女不待問君平

少小璇宮織當牕機九張天孫分重錦價直百千強欲渡明河去牽
牛不服箱謫來北斗下無計挹仙漿

臣里

臣里東家子生來十指柔已矜能挾瑟不自解梳頭蠟淚挑珠鳳風
簾控玉鈎日長消午夢鬪草及春游

玄默執徐

南湖夜聞歌者

輕舟暗度古城東惆悵霜天落塞鴻誰向夜深歌水調傷心不待管

絃終

舟次平望驛

舟人爭利涉日夕更揚舲一水分平望羣山接洞庭風來潮約約煙積雨冥冥愁聽巖更發中宵尙未寧

楓橋夜泊

初月開平林繁星羅遠戍驚禽沙上鳴漁子夜深語遙聞歌吹聲暗入楓橋去

治平寺

招提下山路一徑轉迴塘塿影開初地鐘聲落上方陰崖深樹綠斜日亂峯黃湖上扁舟興沉吟意不忘

中峯尋

讀徹

上人不遇

中峯藤蘿上亭午傳齋鐘無復憚長路因之策短筇山明石齒齒樹暗雲容容不見支公鶴相隨塵外蹤

白紵詞二首

吳王宮中夜欲闌
秋江露白芙蓉殘
青娥二八羅裳單
左鋌右鋌何娑盤
明星滿天月三五
城頭坎坎夜擊鼓
君王既醉不知音
猶向燈前作歌舞

天橫北斗夜沉沉
美人並進揚清音
白紵輕衣香氣深
玉釵亂墮無人尋
此時但恐君恩竭
急管繁絃那能歇
明燈忽滅烏夜啼
醉起更衣滿江月

江亭

楊柳官亭外
春來送客頻
傷心車馬地
淚盡復生塵

古興二首

空井雙桐落葉深
銅餅百丈響哀音
美人不見涼風至
愁對秋雲日暮陰

羅生芳草綠汀洲
少婦明妝北渚游
日暮清歌何處發
蘋花秋水木

蘭舟

哭萬兒

提攜猶昨日髣髴憶平生
夜火銅盤淚春風竹馬聲
無錢輕藥物瀕死念聰明
迢遞黃泉道沉沉慟汝行

送王翊游粵

好去羊城道吁嗟契闊深
離羣空悵望惜別重登臨
零雨哀南土晨風念北林
征途祭酒客天末渡江吟
煙火蠻鄉少山雲驛路陰
桃榔交嶺樹孔雀擾家禽
去問楊孚宅歸看陸賈金
梅花如可寄幸慰故人心

立秋後一夕同睦

修季俞亮朱一是繆永謀
集屠爨齋

涼風吹細雨蕭瑟度庭陰
把袂來何暮當杯夜已深
天邊同落魄江上獨愁心
誰念新亭淚飄零直至今

送袁駿還吳門

袁郎失意歸去來彈鋏長歌空復哀天寒好向汝南臥酒盡誰逢河
朔杯遠岸楓林孤櫂入平江秋水夕陽開要離墓上經過地知爾相
思日幾迴

題畫四首

林深屐齒未曾經萬壑松濤偶坐聽我若支筇來此地便攜酒榼上
茅亭

綠蕪遠近山參差露氣暗浮松樹枝烏篷七尺屢回首看到月明歸
未遲

長林楓葉早霜催絕磴鳴泉激石迴料得山樓聽不盡絃桐欲寫又
徘徊

竹梢藤蔓淨飛沙冷翠疎林不著花羨殺幽人此高臥更無剝啄到
山家

集句題王女史畫蓮

可愛深紅閒淺紅滿池荷葉動秋風縈迴謝女題詩筆一片西飛一

片東

昭陽大荒落

卽席送王

廷璧

朱士稚

同之松江

楊柳青青覆板橋春江花月夜生潮停杯又是他鄉別無那相思一
水遙

遣悶

一雨竟十日蕭條成暮春歡娛那有地歲月漸過人煙草天邊路風
花陌上塵良游如可再尊酒莫辭頻

閑情八首

邂逅重門露翠鈿娉婷不嫁惜芳年徒勞暇日窺香掾漫想橫陳得
小憐洞口桃花何灼灼江南蓮葉更田田輸他三戶人僥倖載上胭

脂匯畔船

胭脂匯在構李相傳范蠡載西施處

生來里是比肩名兩美須知定合并北地佳人矜絕世西鄰名士悅
傾城何緣珠樹成連理便擬香車駕六萌不分秦臺漏消息玉簫先
有鳳凰迎

家臨大道不難知夾岸楊枝踈地垂春水白魚多比目秋風紅豆最
相思飛龍藥店虛存骨走馬章臺孰畫眉多事定情繁主簿山南山
北淚連絲

宛轉吳歌別有腔蜻蛉舟小露紅窗梅花日暮風吹樹桃葉春深夜
渡江荀令香消煙宋宋何郎燭暗影幢幢思憑謝女題詩筆畫作輕
鸞六百雙

蓮花細步上蘭階徐整同心七寶釵入室便應金作屋當壚須得酒
如淮身前容易風吹袖夢裏分明月墮懷五角六張看過了何愁作
事兩難諧

舍後方池一水流鵝鵲鷺鷥信沉浮從教露井生桃樹更遣中庭種

若榴錦段未通千里字玉簫猶隔幾層樓不知桑葉城南路五馬寧能共載不

水北花南路不紆形相色授兩心輸莫須遠結千絲網且緩平量十斛珠大婦亦憐中婦豔新人定與故人殊鴛鴦有分成頭白肯許飛還野鴨俱

一自神珠別漢臯經春不見意徒勞門前種樹名烏白水上飛花盡碧桃三里霧同千里遠九重樓恨十重高無因得似紅襟燕恣拂簾鈎日幾遭

渡黃浦

極浦連天闕驚濤壯海門揚舲辭驛路放溜入雲根白霧魚龍伏蒼煙日月昏樓臺朝作市雷雨暗翻盆疏鑿千年久舟航萬里奔摩霄盤野鶴吹浪湧江豚杳渺通長島虛無出遠村祠因黃歇起茸以陸機存上客今何在高文不可論乘槎應未得搖落問乾坤

龍潭曉發

曉發白龍潭移舟綠楊岸篙師暗中語行客水邊飯雞鳴潮始來月
落天未日冥冥煙霧生稍稍城鴉散乘風萬里外擊楫中流半慷慨
游子心臨江起長歎

嫁女詞

啞啞重啞啞鴛鴦隨野鴨誰家可憐窈窕孀容顏精妙難意量大姑
生兒仲姑嫁小姑獨處猶無郎媒人登門教裝束黃者爲金白者玉
阿婆嫁女重錢刀何不東家就食西家宿

七夕詠牛女二首

浪傳靈匹幾千秋天路微茫不易求今夜白榆連理樹明朝銀浦斷
腸流

瓜果中筵笑語微西樓涼月夜開扉無因得泛浮槎去親向天孫乞
巧歸

南湖卽事

南湖秋樹綠放權出迴塘簫鼓聞流水蒹葭泛夕陽心隨胡鴈滅目
斷楚雲長惆悵佳人去憑誰詠鳳凰

送林

佳璣

還莆田

高樓置酒觴今夕愁聽驪歌送行客搖落深知羈旅情飄零況是雲
山隔林生磊落無等倫鳳雛驥子誰能馴一朝忼慨辭鄉里幾載飢
寒傍路人平生崔嵬好奇服流離取作窮途哭往往詩歌泣鬼神時
時談笑驚流俗林生林生骨相奇昂藏不異并州兒看君富貴當自
有不合憔悴留天涯高秋別我閩中去行李蕭條慘徒御客舍清江
萬里船鄉心紅葉千山樹九里湖邊倚翠屏穀城山下俯清泠寒風
江路兼山路落日長亭更短亭嗟予分手天南遠惆悵河橋送君返
遠客休辭行路難高堂應念還家晚

送十一叔游中州二首

木葉下亭臯西風一鴈高驅車千里道結客五陵豪河水浮官渡關
門鎮虎牢驪駒方在路尊酒意徒勞
旅館涼風起秋城畫角哀天涯方遠客祖道且深杯山色陰中岳河
流繞吹臺梁園多雨雪歲暮好歸來

送通門

和尚住持太白山

越山東望路迢迢澗口寒藤度石橋惆悵空林飛錫遠海門秋雨浙
江潮

送屠

熾

入閩

故人千里去風雪上行車南浦悲長路西河歎索居江猿啼遠近天
水入空虛莫作經年別高堂正倚閨

逢姜給事

塚

黃門先生官左掖力欲拔山氣辟易虎豹天關閉九重孤臣血肉徒
狼藉東萊蜃市易沉淪南國相逢淚滿巾青鞵布韞江湖外誰念當

時折檻人

簡陳秀才

光緒

幾日秦嘉去應留贈婦篇盤龍明鏡好雙笑玉臺前

長安賣卜行贈吳三

統持

集杜句

翻手作雲覆手雨長安布衣誰比數天涯涕淚一身遙避地何時免
愁苦男兒性命絕可憐實籍君平賣卜錢身上須繒腹中實長安市
上酒家眠酒酣拔劍肝膽露勾陳蒼蒼玄武暮人生萬事無不有世
人那得知其故揚眉結義黃金臺亦知窮愁安在哉可憐懷抱向人
盡黃帽青鞵歸去來寂寞江天雲霧裏舍南舍北皆春水龐公隱時
盡室去我獨何爲在泥滓強移棲息一枝安百遍經過意未闌復有
樓臺銜暮景也從江檻落風湍多才依舊能潦倒百壺且試開懷抱
但覺高歌有鬼神不知明月爲誰好吾兄吾兄巢許倫路難悠悠長
傍人可憐爲人好心事終日坎壈纏其身

無題六首

金谷繁華地風流石季倫
量珠凡幾斛買取墮樓人
織女牽牛匹姮娥后羿妻
神人猶薄命嫁娶不須啼
夢逐山頭去身從掌上迴
黃金如結屋先築避風臺
月映凌波韞風飄出水衣
莫教仙犬吠花下阮郎歸
漢臯珠易失洛浦珮難分
不及閒男女肩挑六幅裙
養就芙蓉粉勻成十樣牋
相思無別語只解勸歸船

哭王處士 翹 六首

書信傳初到銘旌已在途
今來紛涕淚昔別念須臾
迢遞悲長道艱難喪老儒
山陽懷舊賦流恨滿江湖
遠道將歸客孤舟返舊林
招魂迷楚水臥病絕吳吟
夢裏羅含鳥囊中陸賈金
猶憐別時語悽斷故人心

江海飄零日秦川喪亂餘
淒涼蒿里曲生死秣陵書
零雨沾青草高

原哭素車南山桂搖落無復子雲居

知己從今少平生負汝多人生看到此天道復如何流水笳簫曲悲風薤露歌王猷竹林在舊徑不堪過

落日明丹旄飄風卷縹帷途窮偏作客身老獨無兒書籍今何託人琴不可知高山空有調回首失鍾期

相送悲長別還家慘獨行流連簡書札次第念交情自有篋中作何難身後名泉臺應快意未必似平生

曝書亭集卷第二

曝書亭集卷第三

秀水 朱彝尊 錫鬯

古今詩二

闕逢敦牂

同舍人五兄登觀山頂

杖策荒塗外憑高遠樹重微茫開積水縹渺見孤峯細雨春歸鴈深
山日暮鐘何年共招隱相伴入雲松

送王涉遊嶺南

送君西去大江深回首雲煙楓樹林嶺路千山萬山外相思孤月夢

中尋

寄懷徐孝廉之瑞

憶別吳山事隱淪相思煙草歷冬春餘杭溪水空千尺不見雙魚白

錦鱗

贈別王山人 元慧

王猷原愛竹圖畫得天真老去貧尤甚年來妙入神與余情不淺傾
蓋日相親紈扇題教遍屏風點更新蕭疎抽直榦蒼翠染叢筠兩暗
瀟湘夕煙浮鄂杜春枝柯紛異色水石盡堪珍國史傳文苑君家有
舍人 舍人名紱善畫竹不苟作嘗退朝黔國以雙縑索畫呼之不應
至三年始致之又月夜聞鄰人吹簫因圖尺幅與之曰以簫材
報汝其人更求別 風流存髣髴清切典絲綸散直矜通籍吹簫狎比
鄰一朝翻毀裂萬里幾逡巡能事原殊俗當時信絕倫昔賢從脫略
似爾實悲辛白髮重湖海青山廢隱淪狂歌老藤杖醉脫小烏巾不
厭經過密惟應歎息頻物情輕一藝有識定千緡相賞知何地思歸
及此辰郊扉餘舊業雲壑息勞筋早晚扁舟就三江共采蓴

示弟 彝玠

攤書仍不學萬慮亦徒然就市非長策躬耕少薄田請纓今日事作
賦幾時傳莫效諸兄嬾蹉跎媿昔年

公過

遲客無三逕浮杯自獨園林棲堪永日瓢飲坐忘言竹戶青蟲網荷
風翠鳥翻更看涼月上徙倚向南軒

七月八日夜對月

素月弦初直清宵漏轉添乍堪盈手贈無復兩頭纖影動明河鵲涼
生碧海蟾玲瓏看不定試上水晶簾

得譚七表兄

吉璉

西陵書集杜

蝦菜忘歸范蠡船斷腸分手各風煙更爲後會知何地自斷此生休
問天縱酒欲謀良夜醉將詩不必萬人傳江山路遠羈離日郭外誰
家負郭由

俞汝言

移居八首集杜

亂後居難定臨江卜宅新入門高興發對酒滿壺頻爲客裁烏帽呼
兒正葛巾平生飛動意披豁對吾真

寂寞書齋裏幽偏得自怡
美花多映竹小水細通池
丘壑曾忘返招邀屢有期
論文或不媿步履過東籬

田園須暫住版築不時操
落景聞寒杵牆頭過濁醪
雜花分戶映亂石閉門高
試問垂綸客吾何隨汝曹

簡易高人意村花不掃除
日長唯鳥雀客至罷琴書
曬藥安垂老鈔詩聽小胥
由來意氣合歲晚莫情疎

卜宅從茲老幽居不用名
倒衣還命駕高枕笑浮生
弟子貧原憲諸公厭襴衡
看君多道氣攜手日同行

隱者柴門內無村眺望賒
圓荷浮小葉秋竹隱疎花
帖石防隤岸傾壺就淺沙
何時一茅屋來問爾東家

牀上書連屋庭中藤刺簷
看君用幽意勝概欲相兼
棗熟從人打杯乾自可添
此時同一醉與汝定無嫌

滿目悲生事終朝有底忙
世人皆欲殺詞客未能忘
回首驅流俗過

逢類楚狂吾生無倚著配爾亦茫茫

懷黃十三後客閩

八月霜清木葉飛關河秋望淚沾衣寒山桂樹今搖落惆悵王孫尙不歸

鷺脰湖寄周四吉亥

鷺脰湖邊水臨流好結廬桑麻深杜曲雞犬擾秦餘紅葉層層樹銀花寸寸魚耦耕兼有伴暇擬著叢書

八月十三日夜汎月太湖

爲愛清秋月中流獨扣舷艱難羣盜路寂寞五湖船白髮從今夜青山憶往年酒闌愁不寐相顧意茫然

十七日夜月

待月涼宵靜更深醉玉缸空城懸北斗流水入西江落葉紛無數驚鳧起一雙高樓思蕩婦茲夕定當牕

旅興呈舍人五兄二首

舊宅烏衣巷涼秋白苧歌湖山歸路遠風雨閉門多暗壑隱松桂深
潭漂芰荷美人日遲暮芳草奈愁何

旅館三秋客端居百慮違張衡長不樂王粲竟無依夜月彈長鈇涼
風歎短衣天涯芳草盡我馬亦懷歸

寂寞行

寂寞復寂寞四壁歸來竟何託男兒不肯學干時終當餓死填溝壑
布衣甘蹈湖海濱飢來乞食行負薪不然射獵南山下猶勝長安作
貴人

九日同張

璵 承 謀

集錢

汝 霖

宅分賦

魯酒飲未醉商歌調復勞百年齊下淚九日罷登高短髮參軍帽重
寒范叔袍舊來飛動意空羨五陵豪

旃蒙協洽

謁廣陵侯廟 并序

錢塘江干有廣陵侯廟其來古矣乙未三月將之越中問渡展謁廟下按枚乘七發觀濤於廣陵之曲江世疑廣陵國爲今揚州府治然元季錢思復試羅刹江賦證曲江卽浙江楊廉夫韙之時號曲江處士而曾子固撰越郡趙公救災記中有廣陵斗門合之伍子之山胥母之場疑義可析因賦絕句紀之江月松風者思復自題其集名也昔聞江月松風客賦證錢唐是曲江不見郊關廣陵廟靈風長拂舊旛幢

固陵懷古

越王此地受重圍置酒江亭感式微想像諸臣紛涕淚淒涼故國久睽違天寒竹箭參差見日暮烏鳶上下飛猶羨當年沼吳日六千君子錦衣歸

蕭山道中

古樹參差暗春禽日暮鳴東西開水市高下築山城翠竹千家靜清
江二月平昔賢栖隱地巖壑有同情

梅市

仙吏經過處空江日夜流何年市門去千載渺難求竹暗清溪路沙
明白石樓羈鴻與孤客歸思兩悠悠

鑑湖

狂客當年歸四明經過遺跡不勝情澄湖一曲明如鏡身在山陰道
上行

雨坐文昌閣

芳草辭南浦晨風寄北林佳人天路隔帝子水雲深風雨他鄉別羈
愁薄暮心冬青已無樹忍向六陵尋

偕謝

晉吳慶楨

登倪尚書衣雲閣

閣初成日倪公謙
漳浦黃公於此

飛樓跨百尺畫棟長氤氳我來偕客一延佇置身髣髴雲中君憶昔

樓成時尙書歸田里北海方看尊酒開東山終爲蒼生起自從龍馭
歸鼎湖公亦仗節死京都子規燕市尋常見白鶴遼東歲月徂十餘
年間亭已壞游客經過增感慨吁嘻黃公授命大中橋魂兮欲歸
不可招千門白下總蕭瑟何況尙書一廛室請君下樓歌莫哀回首
高城月東出

謁大禹陵二十韻

夏后巡游地茅峯會計時雙圭開日月四載集輶櫪國有防風戮書
仍宛委披貢金三品入執帛萬方隨相古洪流割欽承帝曰咨寸陰
輕尺璧昆命有元龜自授庚辰籍寧論癸甲期清都留玉女惡浪鏢
支祁荒度功攸賴平成理自宜神姦魑魅屏典則子孫貽明德由來
遠升遐亦在茲丘林無改列弓劍祇同悲回首辭羣后傷心隔九疑
鳥耘千畝徧龍負一舟移斷草山阿井空亭嶽麓碑芒芒懷舊跡肅
肅禮荒祠黃屋神如在桐棺記有之筵誰包橘柚隧或守熊羆共訝

梅梁失因探窆石遺榻來憑弔處拜手獨陳辭

南鎮

稽山形勝鬱岩嶢南鎮封壇世代遙絕壁暗愁風雨至陰崖深護鬼神朝雲雷古洞藏金簡燈火春祠奏玉簫千載六陵餘劍舄帝鄉魂斷不堪招

晚過寶林山寺

相傳山自瑯琊東武海中一夕飛至人民皆徙焉

春風從何來吹彼芳樹枝客心坐惆悵日夕千里思出門異南北獨往任所之眷言登茲山已見西日馳羣峯趨戶外出沒成參差置身空濛間恍忽飛來時向下聽雞犬極視窮高卑沉沉西林路光闇從此辭回瞻白雲合林外鐘聲遲

遶門山

修途緣廣隰川暝高煙平迢迢前山路落日西林明舍舟復登陸慰我巖壑情斧斤山林外白石丁丁鳴危梯懸木杪幽谷聞人聲陰晴

古壁暗高下蒼崖傾或見山火出時聞猿鳥驚平看雷雨黑下視源
潭清微風吹素浪日夕沄沄生山田足禾黍水石明柴荆何年此幽
棲深謝世上名無爲在城市戚戚多所營

舟中望柯山

朝光麗華薄清川蕩浮瀾檣楫臨江皋流目肆遐觀丹葩眩重谷素
雲冒曾巒我行旣遲迴顧景多所歡青林翳巖桂香風過崇蘭空亭
邈孤高修竹自檀欒緬懷古之人知音良已難

蓬萊閣晚望

源水桃花樹樹春風燕子家家目斷江南歸思愁人不在天涯

再過倪尚書宅題池上壁

尚書池館古城邊卷幔山光繞座前一自鼎湖龍去後難期華表鶴
歸年石廊細雨生春草蒿里悲風起墓田枉付尼師作精舍粥魚茶
版此安禪

若耶溪

若耶溪頭春水深南風北風樵采音浣紗女兒不得見清江日暮愁
人心

戢山亭子

石磴層層上憑高四望同君王遺跡在寂寞古亭空綠水人家外青
林島嶼中昔年生聚日辛苦舊江東

弔王義士

毓著義士受學于都御史劉公宗周公聞南都不
守絕食義士上書于公曰慎勿為王炎午所
笑乃衣儒巾藍衫投柳橋下死與
義士先後死者潘生集周生卜年

中丞弟子舊家風杖履相隨誓始終閉戶坐憂天下事臨危真與古
人同短書燕市遺丞相餘恨平陵哭義公此地由來多烈士千秋哀
怨浙江東

岳忠武王墓

宋室偏安日真忘帝業艱但愁諸將在不計兩宮還鄂國英雄士淮

陰伯仲間策名先部曲薄伐自江關赤縣期全復黃河度幾灣龍庭
生馬角雪窖視刀鑲城下盟何急師中詔已頒盈庭尊獄吏囊木謝
朝班相狡妻兼煽和成主愈孱長城隳道濟大勇喪成覩舊井銀餅
失高墳石虎閒銘功存版碣鑄像列神姦曠世心猶感經過淚獨潛
傳聞從父老流恨滿湖山朔騎頻來牧南枝尙可攀墓門人寂寞江
樹烏緡蠻宿草經時綠秋花滿目斑依然潭水月終古照潺湲

表忠觀

城邊碧瓦樹靈旂廟口明湖濯翠微罷聽緩歌歸夜月獨存豐碣對
閒扉錢塘白馬迴犀弩玉座青苔上錦衣保障東南功不細祠官異
代豈相違

歸

江南春事早二月已飛花眼見芳菲盡吾生信有涯妻兒空待米風
雨獨還家自斷無長策何勞感歲華

橫山蛟潭

雲根鴈齒階旁覩怪石裂傳聞此山隅有蛟出自穴崖傾箭栝門水

暗玄黃血不見下山人怱悵芳菲節

山為顧況舊居有讀書臺下山歌云日日吟春風芳菲兮欲歇

況所作也

歸次西小江行舟被捉夜宿蔡村田舍二首

石壕逢小吏日暮捉人船斷續清江樹冥濛細雨天一身無倚著三

命苦迤邐亟把迷津問蕭山何處邊

野老原頭立逢迎禮數增江村寒抱被茅屋夜張燈兵革愁何極桑

麻話未能為言官道近一舍是西興

擬古折楊柳辭

手折楊柳條倒樹孟津河十年來繫馬楊柳今瀟娑

同作

山陰 祁班孫

上馬不執鞭但折楊柳枝出門不垂淚但歌楊柳辭

對月簡周質繆永謀

楓林初落日秋露漸沾牕仰視明明月遙臨湛湛江游思陶謝並客
有阮何雙待發清溪櫂相要醉玉缸

柔兆涪灘

山陰道歌送沈十二進

我從山陰來却憶山陰道客舍高歌一送君江南愁思盈芳草芳草
碧迢迢離人千里遙青山謝公屐白馬伍胥潮潮來潮去春江路行
車遠發西陵渡雲暗清溪梅市空風吹修竹柯亭暮迤邐鏡湖邊中
流記采蓮樵風空舊跡沉釀自成川誰家青翰長相見何處紅妝不
可憐溪風橋雲門寺流泉淙淙石齒齒我昔愛奇未到此送君遠游
從此始直上秦山望海水

送舍弟彝鑒之山陰

別情不可道送汝益淒其分手悵前路離居感後時山中伯禹穴江

上伍胥祠何處無芳草池塘遶夢思

午日吳門觀渡

勝日銜杯罷輕舟解纜初盡傳迎伍相不比弔三閭畫舫龍鱗見飛樓蜃市居雲濤看震盪雷雨任吹噓別有張筵客相邀吳市墟王孫五花馬少婦六萌車芳樹晴川外平沙夕照餘泉聲間絲竹人影亂芙蓉爲樂時將晚當歌恨不除閭閻成土俗天地感權輿江表遺風在承平舊事虛吾生多涕淚高會輒欷歔

將游嶺南留別故園諸子

驪駒長路起秋塵遠客清樽不厭頻握手相看猶未醉滿堂明月照離人

錄別

飄飄山上雲泱泱溝中水居人語前除行子夜中起攬衣候雞鳴束帶復隱几上堂辭巖親入室慰妻子戚戚對弟昆依依向鄰里臨當

掩柴扉行復顧桑梓
睽彼雙飛鴻徘徊不能已

金山登妙高臺

高臺堪極目落景一登臨
衆水金陵下孤城鐵甕深
平沙依鴈宿橫笛想龍吟
不見安禪叟寥寥江上心

秣陵

秣陵城闕暮雲封
估客帆檣落日逢
萬里星霜沙塞鴈
五更風雨掖門松
長江鐵鎖空千尺
大道朱樓定幾重
此夕愁人聽鼓角
驚心不似景陽鐘

采石

采石磯邊積雪晴
橫江館外暮潮生
金陵美酒百斛盡
明月滿江空復情

小孤山

北船乘長風南船載柔櫓
篙師戒晨征渡口動津鼓
霧淨開孤峯沙

明橫極浦透迤經前山日色未亭午半嶺界樓臺參差近可覩離離
金碧光窅窅神靈雨遠望空愁心沿流采芳杜

大孤山

兩孤去百里宛在中流半匪獨形勝殊氣亦變昏日天梯鬼斧開廟
火神鴉散昭昭雲月輝歷歷明星爛空水既澄鮮浮光亦凌亂飄颻
御冷風恍忽度銀漢未有歸與情空深逝者歎

舟中望廬山

昔予志名山夢寐五老峯今茲遠行邁舟楫欣來逢中流望員闕隱
見金芙蓉空翠非一色飛雲渺千重歷歷澗中水青青崖上松所嗟
限于役策杖誰相從空愁石梁在緬懷虎溪蹤巖棲不得遂惆悵東
林鐘

望湖亭對月

山色匡廬近湖光彭蠡開異鄉頻見月孤客乍登臺遠樹霧中失浮

雲川上來離心似黃鵠中道一徘徊

封谿聶侯廟

返照封谿上停橈思惘然地傳白鹿渚人記赤烏年
簫鼓迎神曲帆檣送客船誰令戎馬日萬里入南天

灘行口號六首

白鷺洲前動客愁黃公灘畔駐行舟誰開瘴嶺天邊路
惟見清江石上流

銅盤灘急水西東兩岸高山四面風絕壁倒飛巫峽雨
懸流直下呂梁洪

黃茅峽外野人居潭影空明漾碧虛長箭短衣朝射虎
鳴榔持火夜驚魚

斷壑陰崖百丈牽斜風細雨萬山連長年三老愁無力
羨殺南來下瀨船

紅霞深樹嶺雲平兩槳戈船石罅行浦口清猿催客淚一時齊作斷腸聲

羊腸鳥道幾千盤設險寧惟十八灘見說一灘高一丈直從天上望南安

虔州懷古

橫浦樓船靜西風草樹彫城荒百戰在地入九江遙豪傑爭先後山陵慘寂寥孤臺下水流恨自南朝

南安客舍逢陸郡伯兄

世楷

以滕王閣詩見示漫賦

憶昨君從柘湖至揚舲爭發吳趨市京口相逢借問君揚舟揚子江心寺晴雲縹渺散碧空歛忽破浪生長風孤舟如巨魚鼓鬣洪濤中川原迢遞不可極布帆飄忽隨西東我從鹿渚超長薄君到洪都更棲泊遠望開襟彼一時憑高獨上滕王閣茲樓崛起天下雄珠簾繡柱垂文虹當年王師此高宴一時詞賦推羣公留題真蹟不可見煙

雲過眼須臾變古來文采光燄長千載王郎信堪羨君家兄弟才難
伍甫里聲名動江左揮毫落紙氣凌雲坐令長才失千古我亦天南
萬里行白衣搖櫓度江城閒雲潭影徒回首南浦西山空復情大庾
城邊日將西下馬逢君復攜手座上新開北海樽客中飲我蘭陵酒
酒闌相示絕妙辭九莖勝食齋房芝曲終定有湘娥怨讀罷如聞帝
子悲當前勝地不得上使我沉吟一惆悵舟楫重過定幾時雲山滿
目知無恙明發梅花嶺外看長從驛使報平安側身天地多知己且
莫頻歌行路難

度大庾嶺

雄關直上嶺雲孤驛路梅花歲月徂丞相祠堂虛寂寞越王城闕總
荒蕪自來北至無鴻鴈從此南飛有鷓鴣鄉國不堪重佇望亂山落
日滿長途

滇陽峽

吳山多逶迤粵山獨嶄崒壁立千仞餘洞壑俯穹嵌子午見日月朝夕鳴松杉天風一以至蕭瑟吹江帆懸崖答長嘯空翠溼征衫側聞飛仙度遠見浮雲銜何當斲靈藥坐惜無長鑱

香爐峽

何年香爐峽擅此香爐名匡廬與會稽秀色同削成篁徑散彩翠溪流澹澄明青雲結車蓋白日懸霓旌孤舟泛容與百丈紛縱橫人影如沙蟲林林川上行夕陽下長坂援鳥盡哀鳴征途渺何極惻惻使心驚

大廟峽

連山何迢迢迢迢夕陽外我行會幾時虛舟入青靄崖傾斷車箱廟古陰松檜遙見靈旗翻微風響清籟川光與天容上下如衣帶纍纍白石明窅窅浮雲晦日夕故鄉心山川渺吳會

羚羊峽

泠泠高峽水際曉煙光微一聞征橈發宿鳥皆驚飛浦樹既迢迢山
雲亦依依谿迴修竹靜日出行人稀雙崖信奇峻屹立如重圍猿猱
相叫嘯水石湛清輝遂令游子心萬里亦忘歸林棲如可得願息漢
陰機

寄遠

南風日夕度江潭旅夢還家路未諳寄語寒衣休憶遠更無霜雪到
天南

強圍作噩

元日陰

黯黯窮陰合蕭條歲序遷故鄉應雨雪絕域尙烽煙更憶高堂上頻
思遠信傳辛盤空自好誰爲介樽前

首春端州述懷寄故鄉諸子

客舍千山外春城萬里心草青仍一度雲暗結重陰往事隨蓬轉謀

生愈陸沉承歡違菽水兄弟渺商參負米情空在離鴻思不禁此邦
非樂土何處好懷音枉作窮途哭虛勞澤畔吟蒼梧晴峽遠桂水暮
流深夢斷梅銷嶺囊空陸賈金楓林悲落月苔石憶同岑燕笑應如
昨沉吟獨至今北歸徒躑躅南望益蕭森瓊樹佳人隔梅花驛使臨
短書知可報珍重問江潯

珠江午日觀渡

蠻歌撫節下空江畫舸朱旗得幾雙想像戈船猶漢日忽驚風土異
鄉邦芙蓉遠水迷花渡琥珀深杯覆酒缸近市青樓經亂盡知無紅
粉出當牕

五羊觀

中天臺殿倚南溟玉珮雲衣散百靈瘴雨不開煙樹黑驚濤直下海
門青騎羊舊說朝仙馭銜穀何年降楚庭歎息遺墟今寂寞高林空
度羽人經

篷軒落成曹方伯溶招飲納涼卽席分韻

卷幔溪光夕開軒露氣澄參差交月樹升降護風燈幕府容疎放蠻天罷鬱蒸南園多勝友況挹酒如澗

羊城客舍同萬泰巖煒陳子升薛始亨醉賦

客舍所居堂勝侶時相求興來攜手一展眺恍如孫楚之酒樓樓頭取酒恣驪譔遠勝十千宴平樂海寺鐘聲風末聞江城帆影樽前落夕陽飄忽晴滿林須臾急雨來庭陰蠻天五月不知暑座客相看寒已深我本蘆中人易下新亭淚莫辭魯酒薄拚作高陽醉出亦復苦愁入亦復苦愁黃河之清不可俟何用長懷千載憂陳拾遺巖夫子羅浮四明兩道士意氣寧從杯酒生文章本是千秋事況今生涯羈旅中時危得不悲途窮丈夫三十不自立一身漂泊隨秋蓬雖未白頭成老翁當前有酒且痛飲明朝岐路仍西東

同陳五子升過光孝寺

浩劫虞翻宅沙門大士居寒煙萬井外春樹六朝餘是日風旛動諸
天夕照虛更尋濠上樂偶坐一觀魚

越王臺懷古

君不見越山高高越臺古複道逶迤接南武北望山頭徧白雲西臨
城下環珠浦由來形勝盡高丘萬里天南此壯游驚濤暗向扶胥落
佳氣晴連鬱水浮憶昔中原逐秦鹿五軍失利屠睢戮番君一出王
衡山戶將從征入函谷天教霸象開南溟宵分東井聚五星龍川縣
令起嶺表被書移檄馳邊庭聲言三關盜兵至一時按法誅秦吏萬
人旣築滇陽城千里還開雒王地漢帝當年爲剖符陸生燕喜出西
都冠裳魑結須臾變文錦蒲桃絕世無番禺之交一都會因山築臺
落天外百丈迴盤信壯觀三時朔望長升拜自古羈縻稱外藩誰令
市鐵禁關門不見鮫魚重入貢旋看黃屋自言尊漢使陳觴更行樂
紫貝明犀雙孔雀重來錦石已成山歸去黃金遂盈橐一從菡萏啓

唐蒙越騎校尉甘泉中是誰僂殺棄繻者江淮巴蜀紛來攻伏波下
瀨軍三面樓船戈船齊教戰合浦珠崖隸海隅山薑扶荔移深殿尉
佗城圯夕陽原建德園荒秋樹根虛傳避暑游宮闕幾見浮杯出石
門木棉花開山雨積鷓鴣啼處蠻煙碧舊井潛移郭璞城離宮半入
虞翻宅人事消沉洵可哀千秋朝漢餘高臺漢家遺蹟不可問吁嗟
乎歌風柏梁安在哉

東官書所見

浦樹重重暗郊扉戶戶關長年搖櫓至少婦采珠還金齒屐一尺素
馨花兩鬟摸魚歌未闋涼月出雲間

東官客舍屈五過譚羅浮之勝時因道阻不得游悵然有懷
作詩三首

柱作名山約茲來不易逢雨捎千徑竹苔冷萬年松錦鳥青丘下霞
書石室封向來獨往地惆悵闕仙蹤

傳道朱明洞堪留白石樵鸞凰曾可御蛇虎爲誰驕細草香金澗寒
雲束鐵橋梅花清夢斷彼美罷相要
勾漏來仙令神靈得鮑姑丹砂不死藥竹葉辟兵符白日飛蝙蝠紅
雲泣鷓鴣何能振衣去敢復計窮途

過朱十夜話

番禺 屈大均

黃木灣頭月扶胥渡口舟日方逾北至火已漸西流過雨收紅豆
連波狎白鷗夫君若爨草一見卽忘憂

贈張山人

穆

鐵橋山人逸興長草堂卜築東溪傍彈棋擊劍有奇術飲酒賦詩多
樂方逢人豈憚霸陵尉畫馬不數江都王莫道雄心今老去猶能結
客少年場

贈張五

家珍

可歎張公子流離自妙年身孤百戰後門掩萬山前易下窮途淚難

耕負郭田平陵松柏在餘恨滿南天

贈高儼

高生老畫師往往賦新詩能事絲來重狂歌和者誰飲知犀首好情
識虎頭癡不向銅鞮去尋常倒接離

哀莫處士

以寅

濃花細雨落前簷憶別江樓暮卷簾今日天涯同調盡白楊荒草哭
陶潛

食龍目

龍目原奇樹嘉名自海區何年賦旁挺得與側生俱黃擬支郎眼圓
分漢女珠幾人曾嗜此昌歎未應殊

送曹方伯還里

惆悵紅亭酒登艫奈別何秋風空日夜岐路渺關河重以歸與歎因
之勞者歌還憑長短笛吹出感恩多

夜泊西南驛

生煙平楚夕隱隱見西南獵火寒歸騎津亭暗落帆往來仍嶺外憔悴卽江潭縱有還家夢愁多已不堪

三水道中

浦樹高原盡人家負郭稀夕陽明斷塔風色上征衣老馬長途伏飢鷹側翅飛寒江日西下不送北船歸

崧臺晚眺

傑閣臨江試獨過側身天地一悲歌蒼梧風起愁雲暮高峽晴開落照多綠草炎洲巢翠羽金鞭沙市走明駝平蠻更憶當年事諸將誰同馬伏波

七星巖水月宮

晨策遵北渚初暎麗陽崖淒清曾颺發鬱述素雲霾橫術越故蹊交林冠高齋蒼煙秀松果白石崇基階以茲清曠地結念澄中懷瑤琴

雖無音山水調長諧何必答獻歌魚鳥卽朋儕懷新意猶眷撫往迹
誠乖卽事非浮歡真樂亮難偕

入景福洞登璇璣臺

紺宇陟旣窮靈域探未竭援蘿巡傾崖窺巖辨修碣滅跡超重深拂
衣避碑矸入窅驚坎習出泉自蒙發洩雲晴未歸石火寒不伐吹萬
聆天風明兩見日月芳塵凝花堂象緯逼金闕陰澗待息心陽阿足
晞髮歲晏當來游毋令蕙草歇

由香關至玉虛觀遂轉登絕頂

山行不辭勞况非道路長石門敞層阿沙草敷陽岡仄徑旣窈窕連
峯復青蒼登高眺千里矯首凌八荒飛鳥遺之音埃風吹我裳覽彼
終南詩有紀亦有堂亭亭翠旗列宛宛朱鳳翔忘憂豈在邇爲樂誠
多方何當啓閭闔高舉朝紫皇

下扶嘯臺陟閩風崖自蓬壺徑汎舟入鐘鼓洞

高寒肆冥搜幽異恆心賞窮梯背樵蘇密徑面篠簞睇後路既迴瞻
前渚彌枉緬辭蘇門嘯重作剡溪訪泉石匪自今亭臺已成曩其鏗
異短聞無射中奇響偉茲造化功流形信无妄津逮興故超神淵道
斯廣懷哉謝人寔歸與授吾黨

阻風珠江口漫成十韻

疾風江上起舟楫盡停橈靜聽千林折驚傳百丈颯飛鳴連鴈落高
下斷蓬飄急鼓峒人伐殘虹颺母驕土囊愁岌業板屋歎漂搖望入
孤城近真成一水遙空倉寒聚雀深樹晝聞鴉長短誰家笛東西背
郭樵驅馳嗟異域搖落感今朝惆悵王孫路懷歸不自聊

送巖煒之惠陽

相期且樂酒相見輒悲歌相送有如此相思知若何晴川疎樹遠落
日亂山多別後豐湖月聞鐘應獨過

鬱洲寒望

一丘迴枉渚獨往失斜曛到地無南雪連天有朔雲貪泉懷刺史蠻語問參軍漸聽寒潮落昏鐘隔浦聞

曝書亭集卷第三

五國書院藏書

五國書院藏書
天師廟在扶珠南雪聖天育殿
聖食泉射師衣冠

曝書亭集卷第四

秀水 朱彝尊 錫鬯

古今詩三

著雍閹茂

將歸留別粵中知己

請君膝上琴彈我游子吟
哀絃激危柱離思難爲音
賓御皆煩紆何況居者心
于役旣有年歸哉方自今
不辭路悠長眷此朋盍簪
山川一以隔邈若商與參
行邁日靡靡憂心亦欽欽
汎舟滄浪天驅車遏雲岑
中誠何用寫執手情靡任

峽山飛來寺

花宮蕭瑟暮雲間
絕磴藤蘿迴莫攀
一自高風留帝子
至今修竹滿空山
澄潭犀去沉金鎖
古洞猿歸帶玉環
此夕登臚渾不寐
更教沿月弄潺湲

凌江道中

遠客千行淚離程一葉舟生憎江上水不肯向東流

楊歷巖觀瀑布水

瞻塗越修畛遵渚拂芸苔駕言陶嘉月采隱滌氛囂舍車循曲汜捫葛升陵喬柔萸挺英蕊灌木蔚豐條仰沾潺湲沫俯聆載道颺逝者如斯夫洊至非崇朝靜觀羣化遷始悟萬象超一鼓丘中琴清響流山椒鳴鳥聲相求潛蚪德彌劭願言繫白駒於焉久逍遙

雄州歌四首

雄州滿目瘴雲霾風物當年亦可懷大庾梅花連小庾正階流水入斜階

綠榕萬樹鷓鴣天水市山橋阿那邊蚤雨蠻煙空日夜南來車馬北來船

滇江西下墨江流來鴈孤亭春復秋十部梨園歌吹盡行人虛說小

揚州

山頭風急雨淒淒
篁竹荒茅一望迷
縱有歸人歸未得
空勞夜夜子規啼

席上留別陸兄

世楷

但秉中宵燭重爲旅客吟
驪駒卽長道絲竹本哀音
越嶠停雲遠秦關落日陰
無勞岐路別酒坐已霑襟

庾嶺三首

不隨野雀棲不挹斜階流
顧茲非我鄉胡然久滯留
侵星陟長阜亭午次崇丘
丸丸青松偃鬱鬱玄雲浮
有滄自東來畢景忽西道
征夫念獨宿徒御方相尤

相尤夫何爲獨宿在車下
往矣歲聿除來思月惟夏
大儀互迴游芳華兩徂謝
迴車感長途如歲匪遙夜
我馬旣已瘖征夫本靡暇
曰旦候雞鳴巖程起夙駕

夙駕踰秦嶺連岡勢逶迤一爲愁霖唱慨彼東山詩沾我征衣裳素
絲以爲緇不愁裳衣濕所嗟徒御飢薄寒忽中人不異三秋期言旋
雖云樂翻使我心悲

謁張曲江祠

峻坂盤神樹陰崖鑿鬼工芳塵羽扇冷春燕玉堂空不覩關門險誰
開造化功經過遺像肅千載嶺雲東

晚過東山寺

飛閣流丹蝕層巒積翠多松間明月在惆悵下山歌

題南昌鐵柱觀

丹甍縹緲麗層城鐵柱縱橫練紫清陰洞蛟龍晴有氣虛堂神鬼晝
無聲游人自愛登高賦仙吏仍兼濟物情雷雨忽愁天外至江湖元
在地中行

登滕王閣

峻閣峙洪都，凌虛落照孤。縈迴窮島嶼，波浪接荆吳。舊地君王賞，分封禮數殊。霓旌千騎入，玉佩幾行趨。水汎魚龍宅，花濃蛟蝶圖。星霜歌舞換，俯仰物華徂。蹟以三王重，名將百代俱。雄文思往事，高興亦吾徒。闌檻看如昨，登臨信可娛。西山開積雨，南浦散平蕪。作賦秦公子，行吟楚大夫。由來憑眺地，襟帶有江湖。

阻風吳城

客路愁何極，清樽幸未空。匡廬長在望，不厭石尤風。

舟次彭澤悼萬孝廉

泰

涕淚千秋在，田園萬事非。悲風彭澤柳，宿草首陽薇。但有青蠅弔，虛傳白鶴歸。秣陵書不遠，何處覲音徽。

秋浦

秋浦沙寒鷺浴，敬亭山暝雲流。何處吹來片雨，回風正濕鄰舟。

烏江謁西楚霸王廟

山前松柏憤王宮遺恨當年尙不窮忽見諸軍盡垓下愁聽父老說
江東美人罷舞餘春草駿馬悲鳴自朔風萬歲來游還此地千秋霸
業有誰同

還家卽事四首

回首辭江海驚心念物華漸看鄉樹近彌覺旅程賒避地虛留井無
田學種瓜重爲廡下客慚媿說還家

遠客朱顏改高堂白髮新長貧謀半菽幾日且兼珍遂有耕田計無
勞陟岵頻南陔蘭可采眷戀及良辰

卜築仍無地來歸轉自憐癡兒猶昨日病婦已連年扇有蒲葵攬牀
移莞蔦眠濁醪供取醉不向酒壚前

至此猶餘悸於焉暫息機不辭新蠟屐重理舊鶉衣鬼笑劉龍拙車
看袁紹非生還良已幸長鋏幾人歸

有感介人履安也

雨中陳

三島

過偕飲酒樓兼示徐

晟

吳門十日風雨惡，決明花開忽復落。游人登高愁未已，客子入門慘
不樂。陳生疎放良可喜，雨中過我臨頓里。却話平生同調人，吹簾擊
筑皆知已。皋橋橋西多酒樓，妖姬十五樓上頭。百錢一斗飲未足，半
醉典我青羔裘。坐中臨觴忽不語，南州孺子高陽侶。同是東西南北
人，明朝酒盡歸何處。

吳江顧處士

樵

扁舟過訪留所畫山水圖并新詩見贈集杜

句酬之

君不見東吳顧文學，前者途中一相見。同心不減骨肉親，素知賤子
甘貧賤。故國平居有所思，數篇今見古人詩。飄零已是滄浪客，酒後
嘗稱老畫師。畫師不是無心學，合查高名動寥廓。漫勞車馬駐江干，
數問舟航留製作。春山無伴獨相求，請君一來開我愁。乘興遣畫滄
洲，趣舟楫渺然從此去。乃知變化不可窮，意匠慘澹經營中。陰崖却
承霜雪幹，山木盡亞洪濤風。尤工遠勢古莫比，雲白山青萬餘里。虛

無只少對瀟湘天下何曾有山水浴鳧飛鷺晚悠悠琴瑟几杖柴門
幽嗚呼何時眼前突兀見此屋獨立縹緲之飛樓

屠維大淵獻

喜羅浮屈五過訪

春風蝴蝶飛綠草南園遍知是麻姑五色裙羅浮山下曾相見開門
一笑逢故人遠來問我桃花津若非綠玉杖定跨黃麒麟不然出入
京雒一萬里何爲布素無緇塵相知樂莫樂不用金箱圖五岳況今
天地多戰爭赤城華頂風煙驚山陰道士不得見四明狂客誰相迎
由拳城南春可惜竹石如山水千尺從此扁舟范蠡湖長歌來往裴
休宅

贈顏鼎受

桐鄉顏氏子才大最能詩往作青齊客論文游俠兒星流赭白馬日
射黃金羈不惜歸來困簞瓢樂可知

送王援入蜀省其尊人觀察庭

向晚東城下，驪歌不可聽。
寧親遠行邁，送客出郊坰。
去馬黃金絡，離筵碧玉鉼。
山花開古驛，河柳遍長亭。
絕域春零雨，浮槎夜挂星。
連天秦棧樹，如日楚江萍。
已見投三峽，曾傳役五丁。
飛雲橫太白，丹嶂落空青。
蜀道難如此，瞿塘險未經。
猿聲流暗壑，鳥路入晴冥。
好醉臨卣酒，重題劍閣銘。
還憑梁上月，夢想對儀形。

渡錢塘

渡口乘潮漾，北風輕舟如馬泝。
江東明朝又是山陰道，身在千巖萬壑中。

贈蔡五十一仲光

十里湘湖水，迴流入女牆。
君家湖水上，時有落花香。
海月生江寺，風琴響石堂。
更聞多古調，識曲漢中郎。

梅市飲祁四居士駿佳宅同徐十五祁六分韻

舊里仙人市遙峯玉女巖牕中交浦樹檻外落風帆藥圃穿籬遠沙
泉近海鹹紺園留過客黃獨斲長鑿榻下同徐穉林中對阮咸坐來
殘暑退涼思入楓杉

題祁六

班孫

東書草堂

愛汝谿堂靜開尊乍卷帷江花平岸發山鳥過庭飛東海賦垂釣西
山懷采薇一爲歌白雪高調和應稀

祁六坐上逢沈五

沈五配祁夫
人湘君善詩

東陽年少沈休文五載相思兩地分今日謝家羣從在青綾障外更
逢君

祁

理孫

席上口占

公子華筵醉幾迴玉簫金管夜重催他鄉信美不歸去一飲須傾一
百杯

祁六紫芝軒席上留別

長路何年別幽居此地偏石林芝草秀蘭澤荷花鮮上客且安坐主人猶未眠不知高館裏絲竹是離筵

顯皇帝大閱圖爲吳金吾國輔賦并序

萬曆初太師張文忠公居正秉國勸駕大閱時兵部尙書吳公兌實

典禁旅俾圖以傳子孫錦衣都督同知國輔尙書曾孫也出以觀客

圖長三丈餘內自宮闕外至陵寢極于沙漠止焉繇是萊陽宋琬作

賦南昌王猷定作記而彝尊作詩以述之

神廟垂衣日江陵總百官揆文先奮武慮亂本居安殿上蕭何履朝

中貢禹冠孫通明禮樂方叔莅師干駕馭英雄在超騰士馬驩車徒

看翼翼禁旅尙桓桓畫史真能事披圖得鉅觀丹青榮顧愷宮室擬

胡寬歷歷開城闕高高疊井榦虛無凌倒影縹緲結重欒太液波還

靜長楊露未乾妝樓原自鑲圓殿不禁寒仙仗移平樂霓旌擁上蘭

忽驚千騎並旋訝六營團作氣陳金鼓前驅建玉鑾輕雲承翠蓋麗

日表朱竿遂列堂堂陣爰升將將壇小侯班四姓大閱用三單紫燕
雙絲絡花驄七寶鞍呈能羣角觝教射集星弁觶飲籌無算饒歌曲
漸闌行知塵冉冉歸想佩珊珊遠勢工尤極平原繪更難蕭疎連板
屋迢遞出峯巒百里生毫末諸陵望鬱盤薊門無埃火函谷有泥丸
元老謀猶壯諸孫手澤完錦題探篋笥湘簟展琅玕對此成希覲因
之感萬端雨煙飛蜀錦霜雪皎齊紈賦愧王延壽謠同梁伯鸞儀章
長在目珍重歲時看

飲吳生 理橫 宅

吳郎愛客解千齡勸飲青絲挈玉餅落日兒童齊拍手過江三日幾
曾醒

食魴魚

白小休論小奇珍信可珍炎天來積雪入饌總如銀稻蟹時方早蓴
鱸思莫頻不知江海上幾處罷垂綸

越江詞

山圍江郭水平沙過雨輕舟泛若邪一自西施采蓮後越中生女盡如花

題越江詞後

上虞 錢霍

翩翩公子剡川游五月山陰鏡裏舟自向花前歌妙曲若邪溪女盡風流

曹娥廟觀渡二首

問渡要津吏沿流信楫師江空鳴社鼓風細颯靈旗遂入曹娥廟同觀漢代碑浮江千載恨猶有弄潮兒

小小邪溪女潛來事禱祈罷歌河女坐不上越航歸晉書夏統傳曹娥沉後國人哀

其孝義為歌 河女之章斜日明金闕涼風到錦幃還持白團扇搖動五銖衣

土城山和錢六

江花江草滿江關浣女清歌日暮還曲罷彩雲猶未散春風吹上土

城山

原作

上虞
錢霍

西施明豔世間希此地曾經換舞衣
春色不隨流水盡暮山猶見彩雲飛

雜詩二首

滔滔東流水中有西上魚素鬚
揚洪濤騰決勢有餘雲霧生晦冥川
岳助吹噓白龍未變服胡然愁豫且
亮無圖南志終返北溟居鷄鷓本大
鳥海處揚波濤何意天風來吹之入
魯郊鏘鏘鐘鼓鳴昂首思扶搖青雲
鍛其翻烈風焚其巢先時方笑言後
至斯號咷騏驥服鹽車獼猴騎土牛
於心徒欲速爲計苦不周白洋旣覆
粟太行亦傾轉擇術昧先幾焉能獲
所求

寄屈五金陵

新從白蓮社舊事紫陽君
貽我羣仙詠全勝十賚文
風濤楊子渡松

柏蔣陵雲共有山樓志題書報爾聞

同作

嘉興周箕 青士

昭景元名族宗雷愛道流聞依靈谷住最近孝陵秋倚閣三松樹

風香閣存
陵樹三株

浮江一葉舟匡山多勝侶何日虎谿游

又

秀水徐善 敬可

傳說靈均裔經秋尙未還卜居那有地縹馬定何山五岳朝羣帝

孤舟下百蠻遂令哀郢曲流轉到人間

又

秀水朱彝鑒 千里

三閩文采後之子繼清標少日矜奇服空門賦大招軍容屯朔騎

風物話南朝庾信傷心地江關入望遙

八月十五夜集半邏錢

爾復齋有懷錢四 汝霖錢四本 姓何

舊識何顥宅 嘉興李繩遠斯年溪亭雜樹交秋花低結子彝尊寒竹

暗抽梢屢下南州榻 嘉興李良年武曾彌慚左顧庖山鉞攜榼酒海

鹽錢爾復子湘野藪出杭肴樂飲傾三爵嘉興李符分虎賓筵賦載
呶風多沉北斗繩遠雲密自西郊肅肅離鴻下彝尊栖栖獨鶴巢空
堂驚蟋蟀良年涼牖落蠨蛸待月虛高詠爾復停杯試解嘲小山棲
隱處符悵望隔衡茅繩遠

過筏公西谿精舍懷羅浮屈五留白下

爲愛精廬好海寧朱一是近修還從勝侶探嘉興屠曠闇伯連山藏
礪戶屠焯昭仲百頃漾風潭嘉興李鏡明遠暇日同看竹嘉興周貧
青士終朝罷采藍嘉興繆永謀天自汀洲縈曲岸嘉興鄭珮隨始空
翠入層嵐嘉興沈進山子靜聽蓮花漏彝尊幽尋燕子龕李繩遠林
泉訪支遁李良年晨夕過劉惔李符慧業知相似一是玄言試共參
曠香雲浮貝葉焯松火照金函鏡坐起頻移榻貧遲留此盍簪永謀
漫須觀露槿珮且與薦霜柑進高興雖云洽彝尊離懷總不堪繩遠
同心方遠道良年輟櫂復停驂符澤畔吟應數一是淹中臥未甘曠

飄零曾薊北，焯淒泊又江南。鏡赤羽紛傳檄，篋青鞵孰荷擔。永謀石
城秋草積，瓊瓜步夕陽含。進佳訊憑誰寄，彝尊端居祇自慚。繩遠西
飛有孤鶴，良年天末望蘇耽。

懷嚴焯客嶺南

老去嚴夫子，辭家久不回。升沉安可問，時命轉堪哀。尚有高堂在，曾
無驛使來。遙憐望鄉處，日上越王臺。

同曹侍郎遙和王司理士禎秋柳之作

回首秦川落照殘，西風遠影對巒岿。城頭霜月從今白，笛裏關山祇
自寒。亡國尚憐吳苑在，行人只向灞陵看。春來已是傷心樹，猶記青
青送玉鞍。

同賦

構李曹溶

灞陵原上百花殘，隄樹無枝感萬端。攀折竟隨賓御盡，蕭疎轉覺
道途寒。月斜樓角藏烏起，霜落河橋駐馬看。正值使臣歸去日，西

風別酒望長安

初秋泊錢清江

錢清江口水平堤雲木參覃磴不齊川靜未聞鴻鴈度雨昏時有鷓
鴣啼逃名梅尉來吳市避地梁生入會稽枉自含情臨北渚秋風嫋
嫋草萋萋

飲張司理陞南華館題壁

南園載酒勸君歌涼月紛紛照薜蘿鏡水連天八百里張星依舊在

明河

梅市對雨遲朱士稚不至同呂師濂祁理孫分韻得泥字

溪亭蕭瑟水雲低積雨千山極望迷落葉漸看沙徑滿寒烏偏傍女
牆啼重來賓客仍羈旅此去鄉關亦鼓鼙何事懷人坐惆悵且拚今
日醉如泥

留別董三監

珍做宋版印

離堂翦燭重燒燭深夜他鄉說故鄉作客蕭條官舍下逢君歌哭酒
壚傍明朝分手仍南北後會相期各渺茫長路烽烟驚海甸亂山風
雨暗河梁

上章困敦

同杜

濬 俞

汝言 屈

大均

三處士放鶴洲探梅分韻

徑轉叢篁曲谿迴石磴斜爲園傳故相
唐相裴休別業 勝事復吾家晚日吹
山雨陰雲覆浦沙春風三百樹猶有未開花

送汪進士

挺 游嶺南

獻歲發吳閩緣流抵建康北風吹五兩幾日上潯陽榕葉山城暗梅
花驛路長回思舊游地飛夢到君傍

和曹使君憶姚州酒歌二首

姚州白酒白於泉醉客何論三百錢十月糟牀初滿注莫教焚却子

猷船

曹娥江口晚潮低兩槳春船入會稽最憶黃冠鼓倒日夕陽山色鑑

湖西

聞東莞查明府舅

培繼

擢戶部書寄

飛來雙燕子遠自羅浮山為報神明宰青春万里還風煙辭粵嶠車馬下秦關從此相思夢無煩到百蠻

寄顧處士

有孝

東吳顧文學念爾亦窮途留客還難黍傾心及釣屠江城二歲別書札一行無何日能相訪扁舟范蠡湖

別杜

濬

石城烽火後孤客轉浮沉乞食來吳市為園失漢陰襄陽耆舊傳荆楚歲時心還復扁舟去淒其洛下吟

同魏周二處士集鍾

淵映

宅遲愈

汝言

不至

城隅急雨漲溪沙酒坐銅盤燭影斜有約南樓懷謝監起看江水落

江花

士 附錄 蘇氏 幾曲 謝平 戲中 計

簡朱十

秀水 項奎 東井

昨日南樓讌懷人到燭斜風前吟未足江水落江花

寇至二首

百里寒山下萑苻遠近齊探丸分赤白放溜各東西都尉金爭摸蚩

尤霧忽迷今宵聞野哭應有萬行啼

我友遭維繫空留舊竹林徒聞鞭甯越猶未釋陳琳黃犢誠難賣青

氈詎可尋垂堂原有誠端不為千金

里中王秀才訪為寇執至營中家貧無金可贖遭害

壽姚太學 集杜

五十白頭翁經書滿腹中畏人成小築把釣待秋風黃卷真如律清

樽幸不空看君多道氣恥與萬人同

寄表弟查 容

查容倜儻無與儔頻年題詩黃鶴樓一朝攜家忽西下挂席遠返荆

門舟平生與予未相識相逢意氣何相投往時寒食一百五鬪雞要

我東城遊東城春寒吹細雨留我南軒長夜語坐中陳

光緒吳統持

十數公一時傾倒相矜許呼僮將炙襄陽兒喚婢監廚大堤女盤中
尙進武昌魚甕頭更出宜城醕別來幾月不相聞聞道新詩更軼羣
九日登高還落帽三秋對酒定論文由拳城西白日短寒風淒淒雪
纂纂舟楫傳君數往來音書未得通情款妻子猶從廡下居朋簪尙
遺堂中滿年來我亦善留賓千金散盡空一身不知生產緣何事仍
復饑寒傍路人只今交道非疇昔論心那得同金石空手徒令壯士
慚因人遠道非長策勸君有錢須愛惜楊朱岐路見不悲阮籍窮途
慟何益

屈五來自白下期作山陰之游

楚調聞高唱吳航下舊京涼秋入九月招我固陵城射的仙人去籠
鵝道士迎明湖凡幾曲攜手鏡中行

同作

番禺 屈大均

最恨秦淮柳長條復短條西風吹落葉一夜別南朝
范蠡湖邊客相將蕩畫橈言尋大禹穴直渡浙江潮

送屠爛重入閩

閩嶠曾游地仙歌聽未終花源凡幾曲身入幔亭中

梅市逢魏璧

前年逢君射襄城山樓置酒懽平生淳于一石飲未醉孟公四坐人
皆驚今年逢君梅福市潦倒麤疎已無比寒暑推移六七年眼前貧
賤猶如此悲君失意成老翁況復奔走隨西東攬鏡不知頭盡白逢
人先說耳初聾山陰祁生賢地主好奇往往相傾許豈無上客朱用

調與姜廷梧

齊向高堂飯雞黍哀絲急管何其多酒酣坐起舞婆娑
魏生魏生奈爾何百年強半成蹉跎天生汝才豈牖下何爲抱膝徒

悲歌

柯山

柯亭山下路修竹暮紛紛衆壑千尋暗雙崖一徑分沙光明草樹日
氣冷江雲更憶中郎笛寥寥不可聞

送錢六

霍

朱大

士會

同游白下

高詠方從月下聞佳書猶未換鵝羣一朝並馬金陵去閒殺羊欣白
練裙

同王二

猷定

登種山懷古招屈五

大均

翠磴盤雲外蒼山出水隈樓從飛翼上峯引臥龍迴相宅先謀士成
功倚霸才扁舟一以去高鳥至今哀授命誰能爾知幾不易哉古碑
猶宿草春殿幾寒灰流覽窮高下川涂足溯洄車書王會地雲物怪
游臺鄉路迷吳苑賓朋得楚材清言同謝許妙道解宗雷不分征衣
薄寧愁落日催成連能就我急爲抱琴來

雪中得內人信

河橋風雪斷歸航遠信沉吟祇自傷不道比來相憶苦虛煩錦字十
三行

古意二首

涼秋八九月游子當遠行寫心未及竟轅馬顧我鳴我車駕君馬我
馬駕君車徘徊四野中執手且斯須何用問遺君約指于闐玉上有
龍子蟠下有鴛鴦宿繚以五色絲青紅與碧綠願君一分手思我贈
君時潛淵與皎日信誓終不移

嚴冬十二月飛來雙白鷓錦字盤中詩中央周四角君書我當報我
書君當開徘徊一室中庶以喻中懷何用問遺君却月裁胸前縫以
七孔鍼著以同功絲青紅與碧綠五色絲相連願君一置腹思我寄
君情轆轤與車轂輾轉何時平

寓山訪屈五

草綠南園積雨餘溪橋宛轉石門虛山頭白鶴遙相待知有仙人射

的居

同宋使君^琬游雲門山

頻年客會稽愛茲山水幽咫尺雲門寺經旬不出游朝霞開霽色喜
見風雨收使君高興發要我登輕舟輕舟出遙汀人語答清泠流連
石帆下遂至樵風涇北船吹以南南船吹以北欲問仙人居迢迢不
可得仙人張射侯乃在雲中弋一鶴西飛來拾矢清谿側鶴飛猶在
沙回流泛若邪可憐誰家女顏色如荷花新妝映碧水一笑浣溪紗
如雲匪我思但弄邪溪月裊裊綠蘿煙照見清輝發際曉衝薄寒更
衣度林樾鬱金蘭陵酒酌以鷓鴣杯一飲動一石不覺玉山頽扶我
上馬行有似乘船迴便蠟阮孚屐來登任公臺昔賢多奇懷眷此滄
洲釣至今臺下泉清風滿雲嶠蕭蕭翠竹陰隱隱哀猿嘯猿嘯溪風
生動影搖空明時從翠微半一聽鐘鼓鳴鐘聲來何遲及此夕陽時
山尋子敬宅塔訪辨才基明當凌絕頂更讀秦皇碑

山陰送葉六變還當湖

畫舸乘風一葉輕
紅亭相送客相迎
最憐小史如初日
不勸離筵到五更

山陰客舍送高舍人還膠州

公子翩翩狐白裘
向予長揖返膠州
西陵松柏閭門柳
繫馬春風何處樓

送蔣翰林超歸金壇

自聽驪駒唱
彌令客思牽
相逢纔破月
惜別已殘年
紅葉山中屐翰林
金沙渡口船
遙憑千里夢
飛度玉堂邊游雲門賦紅葉詩三十首

萬歲通天帖歌贈王舍人作霖

千金購墨妙摹自
萬歲通天年
自從靖康亂
人間始覩真蹟傳
百年以來藏項氏
年時記得曾開視
雖無烏衣四七人
尚有金輪十三字
若非薛稷鍾紹京
安能運腕如天成
銀鈎薑尾細豪髮
懸針垂露紛

縱橫表上中書勅開宴九賓咸列武成殿題扇書裙恍再逢看朱成
碧誰能辨由來神物難久留昨日之日忽我道留題已入他人室想
像空深異代愁王郎生長山陰縣弱年通籍金閨彥贈我盈盈尺素
書君家勝蹟重相見出門瀕洞風塵多願置懷中字不磨試將射的
仙人鶴籠作山陰道士鵝

曝書亭集卷第四

公年補攝... 白雲向平... 吳郡... 西... 然... 蘭... 門... 噴... 渠... 湯... 春... 風... 雨...
五更... 今... 會... 下... 風... 雨... 聲... 如... 雲... 霧... 散... 空... 中...
蒼... 龍... 飛... 鳳... 立... 葉... 舞... 空... 林... 坐... 空... 勝... 豈... 樹... 小... 寒... 吹... 附... 日... 不... 滿... 誰... 談... 庭...
山... 寺... 也... 忽... 幾... 葉... 大... 野... 甚... 嘗... 識... 凌... 絕... 頂... 更... 清... 寒... 真... 神...

曝書亭集卷第五

秀水 朱彝尊 錫鬯

古今詩

四

重光赤奮若

元日對雪簡宋孝廉

實類

令節他鄉會春盤上客偏亂雲迷禹穴獨鶴語堯年坐下山陰雪無
愁射的玄明朝江口望定有孝廉船

上元南鎮逢蕭鍊師

夏后藏書日時巡到海陬周王經野地作鎮表揚州秩祀由來重神
功未易酬河山維十道封爵視諸侯碧瓦雲旗繞香煙石鼎浮笙簫
陳里社巫覡醉春秋勝序羣賢至先生靜者流真形圖五岳遐想結
三洲絳縣年須數黃庭義可求終期御風去長袖挹浮丘

伎席贈王二

松樓竹館映清輝半醉重窺玉女扉我欲傳杯杯不放落花如雪滿
春衣

山陰雨霽同楊大春華游郊外飲朱廿二士稚墓下

簞醪河邊閒杖藜道逢酒伴相招攜醉向南鄰抱被宿際曉不聽天
雞啼醒來忽驚海日出披衣却步無東西殘流小草水泱泱舍南舍
北猶春泥揚雲不曉事要我登會稽香爐乍見紫煙起石簣尚有陰
雲低坐我石橋上影落橋下溪笑看屐齒折未得凌丹梯敝車羸馬
寒食下感念同游淚盈把新鬼今從故鬼鄰百年誰是長年者我今
持杯一勸君有酒且對劉伶墳從教浣女溪頭曲并入山陽笛裏聞

侯山讌集

山係晉孔
愉所居

侯山山上放龜臺百尺紅亭鏡裏開試向花源齊列坐何如蘭渚遠
浮杯巡檐浦樹迎人出卷幔洲禽拂席迴我欲臨風歌一曲起行松

月重徘徊

卷第五

蘭亭行贈朱大士會

右軍三十三修禊蘭亭中一書蘭亭序天矯宛若天門龍我今生年
與之同秋蛇春蚓百不工竭來山陰道柳青桃復紅車如雞栖馬如
狗空使林泉落吾手朝來蠟屐思入山雨急風顛重回首吾宗顙也
書絕倫頻過論書仍論文臨池就我一題扇世上俗學徒紛紛持觴
勸君且傾倒晴日今年去年少曲水東流不待人春風吹徧蘭亭草

梅市訪祁七明府

熊佳

留贈公子

誠孫

因憶亡友朱廿二士

稚

出郭試尋梅福市臨流不減仲長園白花結實垂垂綻紅藥當階故
故翻公子風流能愛客君家兄弟數開樽重憐舊日同游少腸斷空
山聽曉猿

山陰苦雨酬謝處士

孔淵

坐見天公笑何時后土乾游人三月罷煙樹六陵攢苦雨同張協佳

書報謝安濠梁有高興春水更宜看

與朱二十九

驪元

約過楊大

春華

三江村居

獨樹原頭盡三江牖口深聞君理舟楫許我共招尋美醞千花露生魚一寸鉞鼉峯如可望試作水仙吟

贈祁七

敷

曹娥江上草初齊謝傳堂前日未西碧樹紅泉應有待春來絲竹正堪攜

贈沈

華

沈生好畫兼好詩昨朝和我春游詞臨風一曲歌未已惱殺城南輕薄兒城南游女明珠佩青翰舟中時並載生也經營意匠新纖纖貌出當風帶明眸皓腕倚芳叢修短穠纖思不同飛燕忽教辭漢殿西施不見入吳宮尤長花鳥工沒骨染草縈沙細如髮蝴蝶麻姑五色裙蟠桃漢帝千年核新製齊紈更可憐明朝催送下江船煩君畫作

相思樹出入懷中敢棄捐

彭山即事

誰家三婦豔新妝靜鎖葳蕤春日長一出浣紗行石上飛來無數紫
鴛鴦

重經彭山

猶憶清江舊板橋門前曲水細通潮垂楊不是傷心樹那得長條更
短條

南鎮春游詞

黃衫白帽染緇塵惆悵花時已暮春總向越王城下住扁舟須負五
湖人

同作

蕭山 毛奇齡

春船初發白蘋開十里橫塘晚未回南鎮祠前北風起夏王陵上
雨飛來

酬毛十九

奇齡

兼寄張五

杉

逝矣三春日蕭然百尺巖知君南浦上朝夕望征帆湖水蓴絲熟櫻桃馱鳥銜歸期今已近好遣報張杉

偕曹侍郎

溶

施學使

閩章

徐秀才

緘

姜處士

廷梧

張處士

杉

祁公子

理孫班孫

段橋玩月分韻得三字

漠漠孤雲合蒼蒼半嶺含江山攜謝眺風月助劉惔臥柳維舟數驚鳥繞樹三還同牛渚夜高詠信無慚

同王處士

猷定

施學使

閩章

陸處士

折

汎舟西湖遇雨

東風吹落日西下北高峯欲往南屏路中流聽梵鐘迴船沙岸火驟雨石門松不覺碧雲暮涼煙生幾重

觀海行贈施學使

閩章

吾生空好游五岳未登一玉女青童笑向人問君婚嫁何時畢竭來四月西湖邊興盡却返山陰船餘杭春酒亦不惡醉來只向壚頭眠

宛陵施夫子貽我觀海篇吳歛會吟不足聽高張齊瑟絙朱絃我歌
且謠未終曲風雨秦松振崖谷天雞叫罷博桑枝羣飛海水搖空綠
東臨傑閣觀蓬萊瀛洲草暖浮煙開丹田玉闕了可觀空中照曜金
銀臺齊三士魯兩生由來此地才華盛我欲從公問姓名更尋徐市
尋仙去親向蓬萊采藥行

曹侍郎席上送別顧工部

大甲

還華亭鄒進士

祗謨

還晉陵

二子將有
入都之役

古寺登高盡平湖向晚晴琴書方燕息車騎更逢迎置酒從曹植同
游倦馬卿壺觴無算爵絲竹漸飛聲近地多佳客中筵忽送行蒼茫
浮水國迢遞計王程顧愷名元重鄒陽賦莫輕曳裾當日異畫壁一
時傾皎月衣裳好微風羽扇清潮迴黃歇浦江入呂蒙城聞有南征
士橫行北府兵時有兵警河橋分手處前路若爲情

西湖竹枝詞六首

西子湖平鏡面揩雷峯倒影象金釵雲鬢妝就石新婦香草爲裙笥
作鞵

山到漣留城下平橋從慶忌塔前橫郎家側近水仙廟可識水仙王
姓名

西曲誰家窈窕孃獨開小店松毛場何年偷得江陵樣織就女兒黃
竹箱

岳王祠外舞臺偏半在湖塘半在田怕值油車蘇小小勸郎騎馬不
如船

養魚莊說養魚肥放鶴亭看放鶴歸妾在鳳凰山下住生來不見鳳
凰飛

湖面尊絲寸寸長爲郎情好作羹湯朝雲吹散峯頭雨日出團團雞
子黃

同作

秀水

朱彝鑒

千里

段家橋邊湖日陰石新婦下湖水深自從蘇小西陵去松柏青青
直到今

于忠肅公祠

昔在狼山下軍書犯近垆六師輕朔漠萬騎失雷霆土木塵長滿龍
蛇歲不寧豆田沙浩浩黍谷路冥冥濟世須元老長材總四溟從容
持國計指顧悉兵形瑕呂安羣議劉琨表外廷嗣王仍曆數高廟有
神靈既罷金繒款無煩白馬刑北轅旋翠輦南內啓朱局命已甘刀
鑊功真盜鼎銘春秋隆代祀俎豆肅維馨一自輶車至難期埃火停
遺墟愁戰伐大樹日飄零碧草空祠長黃鸝過客聽霜鐘沉曉月風
牖繞明星卞壺誰修墓巫陽數降庭讖還思兩帝碑欲墮江亭遠水
澄湖碧流雲暗壑青千年華表鶴哀怨此重經

徐吏部

旭齡

招飲西湖迴舟卽事

吳姬纖手抱雲和花下迴船燭下歌此夕緣流思並載愁人無那月

明多

施學使

閩章

招集湖舫

朝騎青驄馬搖鞭似飛燕道逢尺一書要我出芳甸是時孟夏初澹
蕩南風遍天公忽大笑向下生雷電吾黨三五人類古之狂狷脫我
尋山屐登艫接高宴作使平頭奴行廚具豐膳雙絲白玉餅勸飲嘉
魴薦向暝更移舟浮嵐夜頻變平湖靜無波皎如一疋練恍忽葑田
中明滅金牛見左持鸚鵡杯右把琉璃研一笑問主人何似宣城縣
試畫敬亭雲貽予白團扇

由淨慈寺登南屏山絕頂晚憩壑菴精舍

南山色蒼翠宛若屏風張下視湖水深十里浮清光是時溪雨止霽
色開秋陽吳娃蕩兩槳送客上方塘靜聽煙寺鐘忽落翠微傍綠蘿
挂絕壁紫葛懸層岡層岡何盤盤松林蔭巖日公等皆好游我意雅
相匹入洞窺乳泉登崖采蜂蜜失道蒼耳中蒙茸久方出出谷齊下

山遂叩中林關山僧顧我笑拍手磐石閒簷前桂樹白鏡裏荷花殷
攀荷坐更遲拂石影相並愛此精舍閒留連日將暝日暝未足愁浮
雲蔽崇丘雷聲驚客聽急櫂迴孤舟

吳山望浙江

一峯高出萬松寒磴道虛疑十八盤近海魚龍吹宿霧中天日月轉
浮瀾風帆岸壓明珠舶仙樹花濃白石壇舊是錦衣行樂地江山真
作霸圖看

湖上贈蘭陵陳生

西泠橋下水清擬惠山流笑問蘭陵客能來釀酒不

寒夜集燈公房聽韓七山人

留

彈琴兼送屈五還羅浮

韓生燕市來夜向招提宿本是悲歌擊筑人援琴爲鼓清商曲安絃
操縵夜三更良久徘徊不出聲坐使閒心遠方聞逸響生商風泠泠
七絃遍天馬空山忽不見石上爭流三峽泉平沙亂落瀟湘鴈聞道

清商固最悲不如清角更淒其一彈試奏思歸引再轉重愁雙燕離
此時晨鐘猶未撞月露霜華滿深巷四座無言歎息頻篝燈欲滅風
升降羅浮道士思幡然忽憶朱明舊洞天種得梅花凡幾樹泥成丹
竈已千年雲山告歸從此始四百三十二峯裏入海能馴海客鷗攜
琴便駕琴高鯉

夜過曹侍郎潞倦圃二首

水泛鷗夷宅沙沉檣李亭昏鐘藏古寺修竹亂明星轉信披衣慣仍
看上馬醒山翁餘興在舉手笑重經

初筵月已上半醉榻頻移罷奏飛龍引長謠猛虎詞時以虎鬻城樂府見示朱

絃清廟瑟若木鄧林枝正喜羊何在明當共和之時周子箕李子兆潢適在郡

玄默攝提格

真如寺塔重建

舊湧仁王塔今開帝釋宮蜂臺重攬勝龍藏古稱雄歷歷時堪紀高

高望未窮地猶丞相宅石是上軍功戰火臨城日飛塵浩劫中魚羊
乘乙酉象馬失西東匠訝胡寬巧圖看郭怒工宣和畫譜郭忠恕
有雪山佛剎圖經
營還故蹟髣髴像新豐點墨遺千界梯雲上半空燈前招怖鴿鳥下
數歸鴻不有危標建安知寶境崇火珠將月滿金冶與天通盤峻宜
承露幡吹定繞風留題存片碣高詠後羣公白髮愁韋誕炎颿靜祝
融伽藍如可記應比洛陽同

采蓴

湖水清無底蓴絲滑可憐相要二五客采采莫迴船坐恐葑田合生
憎苻帶牽祇應櫻筍配羶臠豈容前

同作

周箕

細蔓垂垂弱輕舟箇箇添參差方未已采摘定無嫌入饌銀絲滑
行廚翠釜黏爲憐滋味別更下水晶鹽

又

朱彝鑒

四月湖流闊三潭塔影低最嫌絲滑膩易脫掌東西遠水旋教濯
歸舟亦可攜

家兄貯以瓦盆攜歸長水

當筵嗤小陸羊酪詎堪齊

又

秀水鍾淵映廣漢

絲尊先夏摘何苦待秋風入掌
蟻蜨溜緣流藻荇同魚苗盛水滑
雉尾落盤空一笑辭僮父何勞蒜果筒

湖上逢楊二給事

雍正

零雨三年別晨風萬里遙川涂思往日舟楫復今朝碧草湖邊寺青
驄渡口橋東山有絲竹知爾定相邀

同楊二給事飲徐給事舟中二首

集唐

仙侶同舟晚更移嬌歌急管雜青絲相逢苦覺人情好百罰深杯亦
不辭

風吹洲渚錦帆開絲管啁啾空翠來此曲祇應天上有須成一醉習
池迴

夏日西湖同曹學士爾堪余山人懷汎舟待曹侍郎溶不至

有感舊游愴然於懷作詩二首

翠壑南屏下微風細草薰山雷焚斷塔沙柳拂晴雲白舫朝朝度清
歌處處聞芙蓉如可采相約望夫君

回首憐生事驚心念物華同攜今日酒忽對去年花驟雨翻青蓋圓
珠溜白沙坐看雲色暝餘濕到山家

送曾司理王孫之官漢中

韓信臺前冷戰雲漢王城北罷懸軍三秦父老還相語國士無雙屬
使君

西陵感舊

鄴下劉文學陳留蔡議郎後身那再託同調轉堪傷白首憐金谷青
山棄北邙思歸應有夢未許訴巫陽

九日

九日烏程縣天寒菊自花遠山初過鴈淺渚舊平沙歎逝黃壚隔登
高白恰斜重憐故鄉侶載酒問誰家

糲山橋觀漲

重陽連夜雨初日汎層波不上濠梁望安知秋水多淹留攀橘柚想
像駕黿鼉北渚漫愁思佳期奈別何

題峴山窪樽亭

醉殺烏程酒天寒不放船從教騎馬去日日峴山眠

吳興客夜

東武亭邊樹栖烏夜半啼江清楓葉下天闊鴈行齊不寐仍杯酒勞
生此杖藜誰家采菱調髣髴度前溪

由碧浪湖汎舟至仁王寺飯旬公房

我愛仁王寺來從碧浪湖到門千樹合登閣一峯孤仙梵迷高下香
雲忽有無坐愁風雨至遠與飯秋菰

白雀寺

竹徑何年寺松門百尺巖野雲平石磴江日冷楓杉水落青蓮湧花
飛白雀銜五湖看在望生計有蒲帆

對酒酬周篋兄弟

去作西陵別來從下若還慙勲杯酒在試說道場山

送曹侍郎備兵大同二首

司農論議朝端重副相聲名輦下聞豈意尙煩西顧策翻教暫領朔
方軍河邊遠道人千里天外鄉書鴈幾羣到日關城春色早李陵臺
畔柳紛紛

關榆蕭瑟二庭空埃火平安九寨通往日連師驚朔漠只今市馬互
西東黃河天上三城戍畫角霜前萬里風知有馮唐論將帥不令魏
尙久雲中

將之永嘉曹侍郎餞予江上吳客章二丈爲彈長亭之曲并

吹笛送行歌以贈韋郎送其出塞

韋郎舊隸羽林籍曾向營門教吹笛不聽吳中白雪音定呼鄴下黃
鬚客平原相見轉相親置酒誇君坐上賓下若尊疊朝未罄東山絲
竹夜還陳閒來坐我花閒奏玉洞飛泉嚮巖溜古調多傳關馬詞新
聲似出康王授問我東行到海壖日斜江上慘離筵還將北鴈南飛
曲催送錢塘楚客船船人搥鼓津頭泊紅葉千山富春郭忽作邊秋
出塞聲江楓岸柳紛紛落哀絃促管不堪聽賓御聞之亦涕零挂席
遠移巖子瀨看山直上謝公亭聞君欲問雲中戍雪消飲馬長城去
廣武營邊折柳時黃瓜阜上題書處司農舊是出羣才此日征西幕
府開試向尊前歌一曲梅花飛徧李陵臺

舟行酬王明府

世顯

君從漢陽來飲我宜城酒酒盡沙頭津吏迎乘潮直泝錢塘口憶別
西陵各惘然東山零雨已三年一朝遠作瀛壖吏千里重浮夏口船

君家兄弟文章在

謂孝廉
士乾

夙昔聲名遍湖海此去題詩孤嶼亭白雲

青草遙相待我欲看山到永嘉不辭蠟屐向天涯謝公正有同舟興
相與揚帆采石華

七里瀨經嚴子陵釣臺作

宋謝參軍翱有
西臺痛哭記

七里嚴陵瀨平生眺覽初江山誰痛哭天地此扶輿竹暗翻朱鳥灘
清數白魚扁舟如可就吾亦釣臺居

蘭溪道中懷遠

近郭開門一水居別來消息近何如銀絲細鱸蘭江鯉不見佳人錦
字書

雙溪

小店雙溪口官橋百尺長登盤魚赤尾入市棗青筐菽乳成絲細薑
牙配豉良不知前路去何處石爲羊

金華道上夢遊天台歌

吾聞天台山高一萬八千丈石梁遠挂藤蘿上飛流直下天際來散
作哀湍衆山響燭龍銜日海風飄猶是天雞夜半潮積雨自懸華頂
月明霞長建赤城標我向金華問客程蘭谿谿水百尺清金光瑤草
不可拾夢中忽遇皇初平手攜綠玉杖引我天台行天台山深斷行
路亂石如羊紛可數忽作哀援四面啼青林綠篠那相顧我欲吹簫
駕孔鸞璿臺十二碧雲端入林未愁苔徑滑到面但覺松風寒松門
之西轉清曠桂樹蒼蒼石壇上雲囊玉洞展雙扉二女明妝儼相向
粲然啓玉齒對客前致詞昨朝東風來吹我芳樹枝山桃花紅亦已
落問君采藥來何遲曲房置酒張高宴芝草胡麻迭相勸不記仙源
路易迷樽前只道長相見覺來霜月滿城樓恍忽天台自昔遊仍憐
獨客東南去不似雙溪西北流

黃龍寺

黃龍隘口黃龍寺法鼓空林十里聞故老尙談元總管成功實倚耿

將軍蕭條象馬金輪地寂寞山河鐵券文古往今來意無限仙壇瑤草幾斜曛

蔣廣文薰留飲縉雲學舍爲談仙都之勝

軒后丹砂就乘龍上紫清不知滄海畔亦有鼎湖名故人家住梅溪上渡口扁舟日來往一別柴門已二年看山忽作仙都長要予松下飯胡麻言自仙都道士家時有仙童來海市或看玉女載河車一朝風雨青天注馬跡龍躡不知處蓮花一片天上從風飄落東陽去東陽游女弄潺湲素舸緣流濯足還笑拾飛花看不足當歌明月出雲間廣文先生居四壁青山無數堂階側采藥曾迷阮客蹤窪樽舊是陽冰宅君去仙都訪道書金龍玉簡定何如他時儻入神仙窟攜手同騎白鯉魚

縉雲雜詩十首

吏隱山

隱吏昔山棲留題有真跡將尋好奇人結茅看青壁

窪樽石

不用青荷葉何須白玉杯窪樽山上石醉客有千迴

忘歸臺

連山積翠深白石空林廣落景不逢人長歌自來往

羅鷗灘

灘上羣鷗鳥還應日日來來時看野老百過莫相猜

天際樓

蔣廣文薰讀書處

高樓上浮雲故人曾此住何處問歸舟惟見雲中樹

西巖

朝聞谷口援暝宿崖上月夜久天風吹西巖桂花發

惡谿

惡谿無行舟高下惟亂石谿中玳瑁魚可以薦嘉客

仙巖寺

咫尺仙巖寺雲峯望轉親夕陽鐘磬發猶有未歸人

積翠亭

孤亭雲木暝衆壑哀猿嘯空翠濕衣裳夕陽忽來照

桂山

蒼蒼桂之樹樹下幽人語山中正可留惆悵王孫去

絲丹楓驛曉行大雪度青雲嶺桃花隘諸山暮投麗水舟中

三首

曉發丹楓驛微茫出遠郊月斜吹積雪風急燒黃茅斷嶺羊腸折寒沙虎跡交軍麾猶未靖何處得安巢

隘口屯師日功臣汗馬勞

耿再成破石末宜孫於此

空山無赤幟廢壘但黃蒿亂

插繇花盡千盤細路高繇來設險地未必盡神臯

峻嶺行還出愁人跡轉孤飢寒催暮日風雪遍窮途土鏗須同燎金

刀可剩沽莫辭舟楫小今夜宿江湖

石門懷古寄諸大

九鼎

初此未必盡時事

石門山中瀑布水奔流直下青雲裏晴日遙看細雨飄中林近見微
風起謝公當日此山棲晞髮陽阿路不迷已遣連巖移密竹還營高
館對迴谿昔賢勝跡今游眺佳處猶能領其要我亦沉冥山水人振
衣便可稱同調芳塵瑤席已無存惟見岩嶢雙石門不攜江海同車
客何處相期知者論

謁劉文成公祠

草昧經綸日英雄戰鬪年真人淮泗起王氣斗牛躔命世生良弼卑
棲役大賢一官齊簿尉千里正戈鋌記室依袁紹飛書謝魯連神鷹
思飽掣威鳳必高騫漢祖除秦法周王卜渭畋廟堂才不易束帛禮
宜先遂有君臣契能令帷幄專南征頻克敵北伐旋摧堅王會收三
統軍謀出萬全河山分帶礪冠蓋儼神仙未辟留侯穀長辭范蠡船

麒麟當日畫竹帛後時編一自丘陵改重愁歲月遷隆中猶故宅絲
上少封田舊俗還祠廟清歌入管絃黃金遺像蝕鐵券幾人傳古瓦
龜鼈落荒庭檜柏圓蛛絲虛寢冑鳥跡斷碑眠想像陰符策沉吟寶
劍篇前賢餘事業後死尙迍邐去去辭枌梓栖栖到海壖空林多雨
雪哀角滿山川玉帳無遺術蒼生久倒懸憑留一黃石相待穀城邊

永嘉對月懷家孝廉

一是四首

娟娟東城月濯濯中園露修堞乍升輝廣墀已流素感物成憂端翹
思念情故心賞竟莫同獻歌有遐慕

昔我濟江時別子澄湖陰申以款曲言謂可超重深軒車來何晚離
緒故難任不因道路修惠以瑤華音

瑤華尙阻修何以展嘉覲甌越非殊鄉方舟冀來適新蒲紛紫茸春
草齊碧色徒令芳醕陳庶幾煩慮釋

芳醕無長筵煩慮何由捐我思一何篤有若明膏煎兼山義有託涉

川道未愆安得飛鴻翼報子池上篇

草齋詩永嘉除日述懷

蘇軾

不作牽裾別飄然到海隅謀生真鹵莽中歲益艱虞鄉里輕孫楚衣冠厭魯儒微名翻詆挫暇日少歡愉處賤無奇策因人遠禍樞同舟

邀楚客

王明府世顯

聽曲賞巴歛岸轉羣峯出潮迴衆壑趨江聲漁浦靜

樹色釣臺殊祠宇浮空翠松林儼畫圖羈懷方浩蕩前路已崎嶇草宿侵寒兔林栖逐夜烏微茫辭建德縹緲望仙都水訝溪流惡山將棧道紆僕夫行木末風雪灑天衢老鶴侵晨語窮後入暮呼轉思臨嶼岵誰分久泥塗柔櫓輕帆下青田麗水區哀禽爭叫嘯孤嶼忽須與洵美東甌地由來謝客娛詩篇留汗漫旅食慰飢劬強禁樽中酒難憑肘後符朋簪方克萃禮法未應拘生意窺籠鳥流年過隙駒笑看風土別驚見物華徂紅綻官梅萼青分櫪馬芻深杯期夜酌細菜出春廚坐久親孤燭更深判百觚遠書勞日夜歸夢越江湖正憶高

堂在知攜兩弟俱屢空無長物相視必長吁菽水承顏好辛盤令節
須艱難存病婦燈火索鄰逋書籍愁捻賣衣裳定有無女長工翦綵
男大學投壺倚著憂他日沉吟媿壯夫虞翻仍去越張翰未歸吳詎
有追風驃恆隨汎渚鳧達生兼止託齊物任榮枯述作安時論鶯花
盡友于莫將鄉國淚頻灑阮公途

大牆上蒿行

高秋何多悲風草木黃落盡依于土壤我悲夫轉蓬從風高下亦復
南北西東人生在六合間渺若蜉蝣之羽促迫日暮寧保厥躬何不
恣君中心所欲右挾矢左抨弓追脫兔落輕鴻胸熊蹯炙鹿茸開我
中堂坐我友朋援琴倚瑟鼓鼓考鐘胡爲自苦乃爾十囊五囊之錢
千倉万箱之粟細而鹽豉蒜果量籌握算戚戚思慮終成老翁上有
蒼蒼者天下有薄薄之地日往月來寒往暑來人生安得久長視不
如坐堅車張高蓋貴且快意乘我廐馬出入翱翔黃金爲絡青絲爲

韞魯之乘駟周之訾黃燕之馭騏唐成驪驪雖自謂神且駿曾不如
臣馬良呼韓娥進趙倡歌陽阿引清商暢飛暢舞二八成行輕軀宛
轉長袖低昂目迎心蕩躡屣鳴璫晉之南威楚之陽文吳之夷光稱
名前代亦自謂美而豔夫何可方歲月疾如馳爲歡能幾時升沉分
定窮達天爲獲我所求亦復何思古來達者飲不辭豐刑酒誥徒箴
規劉伶畢卓真吾師但當一月二十九日醉忍使一年三百五日成
齊期

襄陽曲

襄陽近大隄君當慎行旅
笑客襄陽兒憐錢大隄女

曝書亭集卷第五